


柳田文庫  
文庫11  
D 289  
16

16





文庫 11  
D 289  
16

元書卷八十三

邵陽曾廉撰

察罕帖木兒陳友定列傳第五十八

察罕帖木兒字廷瑞姓李氏其先出北庭曾祖闊闊台爲元帥隨國兵下河南家沈邱遂爲沈邱人也父曰阿魯溫察罕帖木兒幼篤學嘗應進士舉有時名而修眉覆目左頰有三毫怒則直指至正十二年汝潁盜起已逾歲江淮糜爛朝廷發兵致討無成功察罕帖木兒乃與羅山人李思齊奮義起兵邑中子弟願從者數百人卽以計襲克羅山朝廷因授察罕帖木兒汝甯府達魯花赤而以李思齊知汝甯府事於是所在義士皆將兵忝會遂屯沈邱盈萬人矣十五年盜益枝蔓自汴以南陷許鄧嵩洛察罕帖木兒兵亦日盛轉戰而北遂戍虎牢賊乃北渡盟津焚掠懷州河北震動

元書

卷八十三

察罕帖木兒等傳

一

010190564024



察罕帖木兒進戰大敗之餘黨柵河洲殲之無遺類除刑部侍郎苗軍以滎陽叛察罕帖木兒夜襲翦之而結營屯中牟已而淮右賊眾掠汴以西來擣中牟察罕帖木兒結陳待之而以死生激士卒各決死戰會大風揚沙自率猛士鼓噪奮擊賊中堅賊遂棄旗鼓遁走追斬無算明年拜兵部尙書而賊已陷陝虢斷穀函欲分趨秦晉察罕帖木兒夜拔穀陵立柵交口陝爲城阻山帶河而賊轉南山粟給食以堅守攻之不可拔察罕帖木兒乃焚馬矢營中象炊烟以疑賊而夜提兵拔靈寶賊遂棄陝州而渡河陷平陸略安邑蹂晉南鄙察罕帖木兒追蹙之下陽賊遂窮潰進僉河北行樞密院事十七年賊出襄樊陷商州殘武關遂趨長安至灞上分道掠同華西臺侍御史王思誠移書求援察罕帖木兒與李思齊倍道赴之入自潼關與賊遇連破之餘黨皆潰散走南山當是時

微察罕帖木兒陝西且殆而河南總兵官欲問其擅調王思誠奏聞乃已語在思誠傳於是朝廷乃超拜察罕帖木兒爲陝西左丞無何賊復出自興元陷秦隴據鞏昌遂窺鳳翔察罕帖木兒卽先分兵入守鳳翔而誘賊圍之城被圍數十重察罕帖木兒將鐵騎日馳二百里掩擊之城中軍亦開門鼓譟而出斬首數萬級餘賊皆奔入蜀關中悉定十八年山東賊分道犯京畿詔徵四方兵入衛察罕帖木兒卽留兵戍清湫義谷屯潼關塞南山口以備他盜而自將銳卒應詔屯涿州未至曹濮賊已分道踰太行焚上黨掠晉冀陷雲中雁門上郡烽火數千里復大掠而南察罕帖木兒卽先遣兵伏南山阻隘而自勒重兵屯聞喜絳州賊果南縱伏兵橫擊之賊皆棄輜重走山谷乃分兵屯澤州塞碗子城屯上黨塞吾兒谷屯并州塞井陘口以杜太行諸道賊屢至守將輒血戰卻之



河東悉定進右丞兼西臺侍御史同知河南行樞密院事天子知其忠壯乃詔守禦關陝晉冀撫鎮漢沔荆襄便宜行事察罕帖木兒益務練兵訓農以平定四方爲己責是年安豐賊劉福通汴梁起僞宮號召羣盜巴蜀荆楚江淮齊魯遼海西至甘肅所在兵起勢相聯結察罕帖木兒乃北塞太行南守鞏洛而自將中軍軍澠池會河南平章政事周全以懷慶路叛附劉福通引兵攻洛陽察罕帖木兒以奇兵出宜陽而自將精騎發新安來援而賊已退去因追至虎牢塞諸險而還進陝西平章政事十九年察罕帖木兒以大軍至虎牢先發游騎南道出汴南略歸亳陳蔡北道出汴東戰船浮於河水陸竝下略曹南據黃陵渡乃大發秦兵出函谷逾虎牢晉兵出太行渡河會於汴城奪其郭察罕帖木兒自將鐵騎屯杏花營而夜伏兵城南屢誘敗之遂克汴梁劉福通以其僞

主自東門遁獲僞后及賊妻子數萬僞官五千符璽印章寶貨無算全居民二十萬軍無所私市不易肆不旬日河南悉定獻捷京師歡聲動中外卽拜河南平章政事知行樞密院事西臺中丞仍假便宜詔告天下先是中原亂江南海漕不復通京師頗苦飢至是平河南檄書達江浙海漕乃復至察罕帖木兒乃謀大舉以復山東而是時河南平章政事孛羅帖木兒移鎮大同遂欲竝據晉冀遂相攻擊朝廷遣使往講不從尋詔以冀甯昇孛羅帖木兒而察罕帖木兒以晉冀皆己手定且用兵數年皆藉給軍食遂不肯奉詔由是構怨日深事亦具孛羅帖木兒傳二十一年察罕帖木兒謀知山東羣賊自相攻殺乃輿疾自陝抵洛大會諸將議師期發并州軍出井陘遼沁軍出邯鄲澤潞軍出磁州懷衛軍出白馬及汴洛軍水陸俱進而自帥鐵騎建大將旗鼓渡孟津踰覃懷而



東復冠州東昌師至鹽河命其子擴廓帖木兒以精卒五萬擣東平連敗賊斬首萬餘級察罕帖木兒乃遣書諭田豐豐及王士誠皆降遂復東平濟甯時羣賊皆聚於濟南察罕帖木兒分奇兵間道出賊後南略泰安徧益都北徇濟陽章邱中循瀕海郡邑乃自將大軍渡河與賊戰於分齊大敗之進徧濟南南道兵亦敗益都賊於好石橋東至海濱郡邑聞風皆送款圍攻三月濟南下拜中書平章政事知河南山東行樞密院事陝西行臺中丞如故察罕帖木兒遂移兵圍益都當是時察罕威聲震天下朱元璋亦自江南遣使通書意欲歸國察罕帖木兒留其使表朝廷授以官察罕帖木兒數推誠待降人明年田豐陰通益都賊請行觀營壘眾以爲不可察罕帖木兒曰吾自坦懷何疑之有左右請以力士從又不許乃以十一騎從至豐營遂爲王士誠所刺訃聞帝震悼中外

之人無男女長少皆痛哭詔贈推誠定遠宣忠亮節功臣開府儀同三司上柱國河南左丞相諡獻武及葬改贈宣忠興運宏仁效節功臣潁川王諡忠襄食邑沈邱所在立祠歲時致祭封阿魯溫爲汝陽王後又進封梁王時朝廷已命戶部尙書張昶郎中馬合謀浮海如江東授朱元璋江西平章政事賜以龍衣御酒元璋聞察罕帖木兒之死也歎曰天下無人矣遂不受朝命擴廓帖木兒本姓王小字保保察罕帖木兒姊子也自幼養爲子爲人沈警壯烈察罕帖木兒旣被害擴廓帖木兒誓欲復讎朝廷亦悉其才於是就軍中起復拜太尉中書平章政事知樞密院事太子詹事仍便宜行事總其父兵擴廓帖木兒攻益都益急賊城守益固乃穴地以入拔其城執其渠陳孫頭二百餘人獻闕下而剖田豐王士誠之心以祭其父尋以兵取莒州山東悉平於是擴廓帖木兒引



元書 卷八十三  
四  
軍還駐太原二十三年李羅帖木兒復遣兵攻冀甯擴廓帖木兒大破之於石嶺關會御史大夫老的沙知樞密院事禿堅帖木兒獲罪皇太子出奔大同依李羅帖木兒明年天子以皇太子故下詔數李羅帖木兒罪削職而奪之兵李羅帖木兒遂舉兵反入京師自爲左丞相皇太子乃乞援於擴廓帖木兒擴廓帖木兒遣其將白鎖住以萬騎入衛駐龍虎臺戰不利遂奉皇太子奔太原二十五年擴廓帖木兒以兵擣大同取之進薄大都而李羅帖木兒已伏誅皇太子欲藉擴廓帖木兒挾兵要帝內禪擴廓帖木兒知其謀未至京三十里卽留其軍以數騎入朝詔拜爲太傅左丞相然擴廓帖木兒久典兵不樂在內會皇太子累請出督師而帝難之乃封擴廓帖木兒河南王俾總天下兵代皇太子出征擴廓帖木兒乃分省中官屬以自隨鹵簿甲仗亘數十里然是時朱元璋

已盡有江楚地擴廓帖木兒知其強未可輕進乃駐軍河南明年檄關中李思齊張良弼孔興脫列伯會師大舉初李思齊與察罕帖木兒同起義齒位略相等察罕帖木兒爲陝西左丞李思齊亦爲四川左丞至是得檄大怒曰吾與若父交若髮未燥敢檄我耶令其下一甲不出武關張良弼字思道始爲陝西參政詔受節制於察罕帖木兒良弼畏其嚴圖自便陰有所倚恃不受命察罕帖木兒與李思齊連兵攻之思齊至武功良弼伏兵破之然以擴廓帖木兒檄遂通好思齊與之合孔興脫列伯亦莫肯統屬擴廓帖木兒歎曰吾奉詔統天下兵而鎮將不受節制安能復討賊乎朱元璋亦屢詒書言當留心關中無徒遠爭江淮之利以閒其謀擴廓帖木兒乃遣朱珍盧旺屯兵河中遣關保虎林赤西攻良弼於鹿臺思齊等救良弼兵連不解明年思齊良弼脫列伯等會兵長



元書 卷八十三 五  
安盟於含元殿舊基推思齊爲盟主併力拒擴廓帖木兒擴廓帖木兒增兵入關攻思齊等益急帝使使諭令罷兵專事江淮擴廓帖木兒欲遂定思齊等然後引兵東乃遣其驍將額高自河中出不意擣鳳翔覆思齊巢穴額高善論兵先爲察罕帖木兒所信任引軍西多字羅帖木兒部曲至衛輝軍變脅額高以叛擴廓帖木兒襲衛輝彰德據之罪狀擴廓帖木兒於朝朝廷固疑其拔扈皇太子又以不從已求內禪深銜之遂因額高奏說帝立大撫軍院以皇太子總制天下軍馬遂落擴廓帖木兒太傅中書左丞相仍前河南王就食邑汝州從行官屬悉令還朝分其軍隸諸將白鎮住李克彝虎林赤等而以額高平章政事竝知樞密院事總河北軍賜其軍號忠義功臣擴廓帖木兒旣奉詔退軍澤州關保自察罕帖木兒起兵以來勇冠三軍功最高至是亦自歸於朝朝廷知

擴廓勢孤乃詔李思齊等東出關與額高合攻擴廓帖木兒而令關保戍太原擴廓帖木兒憤甚遂引兵據太原盡殺朝廷所置官吏於是帝下詔盡削其官爵令諸軍四面討之而是時明兵已下山東收大梁梁王阿魯溫降擴廓帖木兒弟脫因帖木兒軍潰於洛水北李思齊張良弼合兵駐潼關會火焚良弼營思齊移軍胡盧灘明兵遂陷潼關思齊奔鳳翔良弼奔郿城因皆遣使詣擴廓帖木兒告以前此出師非其本心然思齊時總關陝秦隴之師西至吐蕃東至商洛南至礮頭北至環慶擁精甲十餘萬惟與擴廓帖木兒干戈相尋以至大都勢危不救額高關保猶攻擴廓帖木兒於平陽數請戰擴廓帖木兒陽不應或師出卽退旣謀知二人分軍掠郡縣卽夜出師薄其營掩擊之大敗其眾額高關保皆就禽因上疏自理朝廷因歸罪額高關保擴廓帖木兒遂殺之尋詔



元書 卷八十三 六  
罷大撫軍院誅知院事伯顏帖木兒等盡復擴廓帖木兒官爵令  
與也速禿魯李思齊等分道南討詔下而明兵已徧矣擴廓帖木  
兒尋自晉甯退守太原明兵入大都帝北巡明將湯和徇山西擴  
廓帖木兒大敗之於韓店會帝自上都命擴廓帖木兒復大都擴  
廓帖木兒乃北出雁門將由保安徑居庸以攻燕明將徐達常遇  
春遽乘虛擣太原擴廓帖木兒還救而部將豁鼻馬潛約降於明  
明兵夜劫營營中驚潰擴廓帖木兒倉卒以十八騎北走既而元  
塞內悉入於明擴廓帖木兒擁兵塞上明徐達來攻擴廓帖木兒  
禦於沈兒峪敗績亡失數萬人擴廓帖木兒攜妻子至黃河得流  
木以渡遂奔和林時順帝已崩太子嗣立復任以國事踰二歲徐  
達復出雁門趣和林擴廓帖木兒與賀宗哲合兵拒達於嶺北大  
敗之明年擴廓帖木兒復攻雁門明人嚴備之然憚其威兵亦少

出塞矣其後從其主徙金山駐哈刺那海之衙庭卒妻毛氏亦自  
經死李思齊至鳳翔大會諸將兵欲有所爭戰明兵至不能守遂  
奔臨洮明兵至臨洮思齊遂降明其後明人遣思齊往招擴廓帖  
木兒擴廓帖木兒送之歸而遣騎士自中途脅之自斷其臂死張  
良弼既至鄜城復會孔興脫列伯等營於鹿臺以衛奉元明兵至  
良弼西走入慶陽明兵復至良弼懼使其弟良臣守慶陽而自奔  
甯夏爲擴廓帖木兒所執死良臣以慶陽降明尋復來歸爲明人  
所攻殺孔興脫列伯以帝命攻大同兵敗脫列伯爲明所禽孔興  
走綏德其部將斬以降明

陳友定一名有定字安國福清人也世業農少爲傭於清流富人  
羅氏羅以夢徵納爲壻使習商販輒傾其貲坐是大困充明溪驛  
卒然爲人沈勇喜游俠至正中汀州府判蔡公安至清流募民兵



元書 卷八十三  
討賊友定應募公安與語奇之使掌所募兵署爲黃土寨巡檢以  
討平諸山寨功遷清流縣尹陳友諒遣其將鄧克明等陷汀邵略  
杉關行省授友定汀州路總管禦之戰於黃土大捷走克明踰年  
克明復取汀州急攻建甯守將完者帖木兒檄友定入援連破賊  
悉復所失郡縣行省上其功第一進參知政事已置分省於延平  
以友定平章政事於是友定盡有福建八郡之地友定以農家子  
起傭伍目不知書及據八閩數招致文學知名士閩鄭定廬州王  
翰皆留置幕中麤涉文史習爲五字小詩皆有意理然頗任威福  
所屬違令輒承制誅竄不絕漳州守將羅良者長汀人以散財募  
士捕殺山寇提兵解福州圍爲閩銳將又數從海道漕粟京師賜  
爵晉國公雅不善友定所爲因以書責之曰郡縣者國家之土地  
官司者人主之臣役而詹廩者朝廷之外府也今足下視郡縣如

室家驅官僚如僕圍擅詹廩如私藏名雖報國實有鷹揚跋扈之  
心不知足下欲爲郭子儀乎曹孟德乎友定怒竟發兵攻良良敗  
被圍旬月城破爲所殺而福清宣慰使陳瑞孫崇安令孔楷建陽  
人詹翰皆以拒友定死於是友定威震八閩然事朝廷未嘗失禮  
是時張士誠據浙西方國珍據浙東名爲歸國歲漕粟大都多不  
至而友定歲輸粟數十萬石海道遼遠至者嘗十三四天子嘉之  
下詔褒美至正二十六年明兵已據婺州與友定接境友定進兵  
攻處州與明將胡深戰不利亡浦城松溪深復進攻建甯破其二  
柵友定以兵四萬繞出深後斷其歸路而自帥銳師搏戰夾攻之  
遂執斬深逾歲明人旣降方國珍卽遣其將湯和等三路犯福建  
而別遣使至延平說友定降友定遂置酒大會諸將及賓客殺明  
使而瀝其血酒甕中與眾酣飲誓曰吾曹受國厚恩有不以死拒



元書 卷八十三  
者身磔妻子戮遂往視福州環城作壘距壘五十步輒築一臺嚴兵爲拒守計已而聞杉關破急分軍爲二以一軍守福而自帥一軍守延平以相犄角湯和舟師尋至五虎門平章政事曲出引兵逆戰而敗明兵緣南臺蟻附登城守將遁去參知政事尹克仁宣政使朵耳麻不屈死僉院柏帖木兒自焚死建甯旣陷湯和進攻延平友定欲以持久困之諸將請出戰不已友安疑所部將叛殺蕭院判軍士多出降者會軍器局災城中礮聲震地明師知有變急攻城友定呼其屬與訣退入省堂衣冠北面仰藥死所部開門納明師昇友定出水東門適大雷雨友定復甦因執送建康明主問曰元亡若爲誰守能降仍爾官否則伏銅馬友定厲聲曰國破家亡死耳尙何言願伏銅馬遂併其子海殺之海一名宗海工騎射亦善禮文士友定旣被執自將樂歸於軍門至是從死元末所

在盜起民間起義兵保障鄉里稱元帥者不可勝數朝廷輒因而授之官其後或去爲盜或臣節不終惟友定父子死義當時稱完節焉

論曰察罕帖木兒以匹夫起義沈邱幾於再造元室亦可謂雄矣假令稍遲數歲而死則南方豈足定哉朝廷闇於措置致父子不免內訌然擴廓帖木兒終橫沙漠子子孤忠君子亦有以悲其志矣友定始頗跋扈終完臣節桑榆之收亦有元忠臣之殿也



元書卷八十三

曾爽輔

余義發 刊

楊尚友

門人曾傳誥襄校

門人曾士琮詳校

元書卷八十四

邵陽曾廉撰

成宗以下諸王列傳

成宗皇太子德壽貞慈靜懿皇后出也大德九年六月立是冬薨  
仁宗子二人莊懿慈聖皇后生英宗皇帝次順陽王兀都思不花  
史失其所出

順陽王兀都思不花延祐二年初封安王七年仁宗崩英宗降兀  
都思不花為順陽王其歲殺之遣定住括其邸財物入章佩監中  
政院

泰定帝子四人宏吉刺皇后生天順皇帝次晉王八的麻亦兒監  
卜次小辭太子次允丹藏卜太子皆失其母氏號  
晉王八的麻亦兒監卜泰定元年封



元書 卷八十四 小髻太子

允丹藏卜太子泰定三年命受佛戒於智泉寺四年命鎮北邊幼未出閣天順帝崩三王均不知所終

文宗子三人皆宏吉刺皇后生也皇太子阿刺忒荅刺次燕帖古思太子次太平訥太子

皇太子阿刺忒荅刺至順元年封燕王立宮相府其歲冊立爲皇太子二年薨

燕帖古思太子始名古納荅刺至順二年命市故平章政事阿魯渾撒里宅令右丞相燕鐵木兒奉以居之三年更名曰燕帖古思是歲文宗崩燕鐵木兒請於皇后欲立之后以文宗遺詔言立明宗之子遂不許旣而甯宗立踰月而崩燕鐵木兒復申前請后以燕帖古思幼卒不許而立順帝與帝約後傳位於燕帖古思如武

宗仁宗故事焉初明宗之崩也文宗實弑之明宗皇后亦未獲善終旣又以順帝爲諸從長忌之因構飛語安置之於靜江而立其子阿刺忒荅刺爲皇太子未幾薨文宗懼燕帖古思之不克負荷也遺詔復言傳位明宗之子順帝旣立八年伯顏死文宗私黨無在樞要事遂大播於是帝下詔數文宗罪惡語具順帝紀遂放燕帖古思於高麗御史崔敬疏言先皇上崩皇弟尙在襁褓未有知識義當矜憫不報燕帖古思行至中道爲月闡察兒所殺以薨聞詔以鈔百錠備物以祭之

太平訥太子初名寶甯天祿元年易名養於太司農買住保家早薨

順帝子三人宏吉刺皇后生眞金育於太尉眾家奴家二歲而夭二皇后奇氏生愛猷識理達臘而長立爲皇太子第三子失其名



未詳母氏亦早夭

皇太子愛猷識理達臘亦曰愛猷失里八刺幼育於右丞相脫脫家帝嘗駐蹕雲州遇烈風暴雨山水大至車馬人畜皆漂溺脫脫單騎抱以登山乃免六歲還宮始帝命之習畏吾兒字稍長令習漢人文書以李好文爲諭德歸暘爲贊善張冲爲文學既乃爲開端本堂虛中座以俟至尊臨幸太子與師傅分東西向坐授書其下僚屬亦以次列坐而領端本堂事者脫脫也至正十三年立爲皇太子兼中書令樞密使爲置典藏庫以儲錢帛是時右丞相麻進西僧於帝出入宮中太子醜之合麻懼罪而與脫脫有隙乃構脫脫於太子以爲脫脫有不欲立太子意由是脫脫貶死而合麻爲左丞相合麻亦自恥進西僧事遂欲立太子爲帝而尊帝爲太上皇帝覺而誅合麻然太子自是常有尊位矣暨後太平爲

左丞相太子及二皇后奇氏遣宦者朴不花諭意必內禪太平皆不答於是太子欲盡逐帝近臣又令御史劾帝親暱御史中丞禿魯帖木兒未及奏適御史遷他官太子疑太平子也先忽都泄其事益恨太平太子又以爲左丞成遵參知政事趙中太平之黨也乃構而殺之其後卒殺太平事具太平傳太子旣數專殺宰執益以爲帝不足忌朴不花倚二皇后及太子大爲姦利爲臺官所劾御史大夫老的沙者帝舅也甚不善朴不花所爲太子惡之乃奪老的沙御史大夫封爲雍王遣之國老的沙恐逃之大同太尉孛羅帖木兒軍中帝亦密諭孛羅帖木兒留之太子遂爲詔削孛羅帖木兒官爵罷其兵權使平章政事擴廓帖木兒帥師進討於是孛羅帖木兒遂稱兵犯闕太子奔冀甯孛羅帖木兒被誅於延春閣太子始歸又諷擴廓帖木兒使以重兵脅帝禪位擴廓帖木兒



不從則立大撫軍院自總制天下兵馬而黜擴廓帖木兒官奪其兵擴廓帖木兒憤甚遂與王師戰殺平章政事關保貂高於是帝乃下詔罪太子罷大撫軍院是時明兵已下河南山東迫京師矣太子好剛而闇始以帝不恤國事銳欲圖位大有所振興暨後帝遣諸倚納赤教以秘密佛法遂於清甯殿布長席西坐番僧東坐高麗女太子樂甚謂左右曰李好文先生教我以儒我累年不省其義不圖佛法乃一夕盡曉也由是壯鷲之氣亦衰惟急於圖禪以私恨屠將相大臣尋仇激變外沸內訌以訖於亡順帝北行太子從之後二年帝崩太子嗣位於和甯後數年而沒明帝遣使祭弔焉

論曰成宗以下皆徒禮祿宮繼嗣未廣故螽斯之羽非龍興不足以致此盛也愛猷識理達臘以爲苟踐大位天下當平獸鬪魚沸禍先滋矣况又劫父行私也哉而謂一夕盡曉佛法殆傳奕所謂生於空桑者乎



元書卷八十四

楊世治  
刊  
曾傳幹  
門人曾廣冀襄校  
門人曾士琮詳校

元書卷八十五

邵陽曾廉撰

世戚列傳第六十

特辭禪宏吉刺氏宏吉刺始居合勒合河下流捕魚兒海上亦達  
 鞞部落也特辭禪與烈祖友善烈祖攜太祖如幹忽納氏遇特辭  
 禪於扯徹兒赤忽兒古兩山間因止烈祖宿告以夢徵而以光獻  
 翼聖皇后許太祖語在后妃傳中太祖遂留居特辭禪家烈祖崩  
 乃歸後太祖親迎於宏吉刺氏特辭禪親送女至怯綠連河兀刺  
 黑啜勒而還特辭禪子曰按陳曰火忽曰冊初札荅刺盛宏吉刺  
 氏亦附札荅刺太祖既克札荅刺復戰勝克烈宏吉刺氏乃降  
 按陳太祖時為列將降耶律留哥於遼後從取回回尋斯干平西  
 夏太祖以為尚書令賜號國舅按陳那顏復從太宗伐金斷潼關



道所統騎兵十餘萬皆循法當時木華黎頗好殺戮國人言隨國王者皆惡從尙書令者皆善以爲談資焉太宗四年賜銀印封河西王以統其國族九年賜錢二十萬緡有旨宏吉刺氏生女世以爲后生男世尙公主每歲四孟月聽讀所賜旨世世不絕又賜所俘獲軍民五千二百仍授萬戶以統之按陳薨葬官人山生女察必爲世祖昭睿順聖皇后

子幹陳襲萬戶尙睿宗女也速不花公主爲駙馬薨葬不海韓弟納陳襲萬戶尙太祖孫女辭徹干公主爲駙馬從憲宗入蜀復從世祖南涉淮甸下大清口獲船百餘艘又帥兵平山東濟兗單等州中統二年與諸王北擊阿里不哥以其子哈海脫歡幹羅陳等十人自隨戰於莽來因昔木土追北至孛羅克土自旦至夕斬首萬級阿里不哥自是遂遠遁納陳薨葬木懷禿

子幹羅陳襲萬戶尙完澤公主爲駙馬公主薨繼室以世祖女囊加眞公主至元十四年幹羅陳薨葬拓刺里女失憐答里爲成宗貞慈靜懿皇后無子

弟帖木兒襲萬戶繼尙囊加眞公主爲駙馬至元二十四年從帝征乃顏以功封濟甯郡王賜白織蓋以寵之明年合丹多羅干叛與御史大夫玉昔帖木兒帥師由貴烈河轉戰至老木連大敗其衆賜名按察兒禿那顏以旌其功薨葬木懷禿子曰瑯阿不花曰桑哥不刺皆幼

弟蠻子台襲萬戶復繼尙囊加眞公主爲駙馬成宗卽位元貞元年封公主爲皇姑魯國大長公主由是囊加眞以上皆曰魯國公主凡降宏吉刺氏公主皆曰魯國公主位復進封蠻子台爲濟甯王賜駝紐金印由是追封按陳爲濟甯王諡曰忠武按陳妻哈眞



爲濟甯王妃蠻子台後復進封魯王換獸紐金印由是亦進封按  
陳爲魯王其封年史失之蠻子台嘗專擅殺人帝宥之命帥本部  
兵討海都篤哇約戰未定蠻子台單騎突陣出入數四諸軍乘之  
遂大捷時武宗以懷甯王督師令蠻子台總領蒙古軍官守莽來  
以鎮北方囊加真公主薨復尙裕宗女喃哥不刺公主蠻子台薨  
兄子瑯阿不花復襲萬戶瑯阿不花亦曰阿不歹曰孛不刺尙順  
宗女祥哥刺吉公主爲駙馬大德十一年武宗卽位命襲魯王封  
公主爲魯國大長公主至大二年賜平江稻田一千五百頃三年  
瑯阿不花薨葬木懷禿是時子阿里嘉室利方八歲襲萬戶明年  
復襲魯王皇慶間加號祥吉刺哥公主爲皇姊魯國大長公主生  
女不荅失里爲文宗皇后天曆二年詔曰皇姑魯國大長公主早  
寡守節不從諸叔繼尙鞠育遺孤其子襲王爵女配予一人朕思

庶民若是者猶當旌表况在懿親乎趙世延虞集等可議封號以  
聞尋命以淮浙山東河間四轉運司鹽引六萬爲公主湯沐之資  
加號爲皇姑徽文懿福貞壽大長公主至順二年公主薨阿里嘉  
室利尙朵兒只班公主爲駙馬元統元年阿里嘉室利薨至正間  
加號公主爲肅雍賢甯公主

納陳又有孫曰仙童生女南必繼昭睿順聖爲世祖皇后  
納陳弟必哥曾孫丑漢尙台忽魯公主爲駙馬皇慶元年封安遠  
王嗣魯王蠻子台守莽來

必哥弟火兒火都太祖時從征有功授千戶竝遙授左丞相仍賜  
以塗金銀章及金銀字海青圓符五驛馬券六子阿哈尙公主爲  
駙馬憲宗時嘗帥兵南伐以功賞黃白金銀鞍勒命襲父官世祖  
時有詔宏吉刺萬戶所受驛券圓符皆仍舊凡火兒火都所受者



皆收之火兒火都諸孫孛羅沙伯顏蠻子添壽不花大都不花掌吉及阿哈孫也速達兒俱官本藩蒙古軍站千戶

按陳諸孫曰納合尙太宗女唆兒哈罕公主爲駙馬曰渾都帖木兒生女荅吉爲順宗妃後尊爲皇太后又尊爲太皇太后曰斡留察兒亦曰火里兀察兒尙公主爲駙馬生女八不罕爲泰定帝皇后泰定二年封斡留察兒威靖王賜螭紐金印

按陳裔孫脫憐世祖授以本藩千戶仍賜驛券圓符各四命守怯綠連河二十四年從族父帖木兒征乃顏有功賜號拔都兒脫憐卒子迸不刺襲千戶生女眞哥爲武宗宣慈惠聖皇后迸不刺卒子買住韓襲千戶尙拜荅沙大長公主爲駙馬生女曰必罕曰速哥荅里俱爲泰定諸后買住韓卒弟孛羅帖木兒襲千戶生女伯顏忽都爲順帝皇后後至元二年封孛羅帖木兒毓德王賜金印

孛羅帖木兒薨買住韓孫阿失襲千戶

火忽孫不只兒尙斡可眞公主爲駙馬世祖命養瑯阿不花弟桑哥不刺爲子不只兒薨桑哥不刺襲統其部民四百戶成宗時尙普納公主至順三年封公主爲鄆安大長公主封桑哥不刺鄆安王賜金印並授千戶元統元年命襲其兄子阿里嘉室利萬戶二年並襲魯王而進號公主曰皇姑大長公主桑哥不刺以疾薨冊太祖時授本藩蒙古軍站千戶子哈兒哈孫以平金功賜號拔都兒哈兒哈孫孫都羅兒至元四年授光祿大夫以銀章封爲懿國公

特薛禪裔孫曰脫羅禾尙魯不罕公主薨繼室以仁宗女闊闊倫公主曰忙哥陳生女忽都台爲憲宗貞節皇后曰哈兒只生女速哥失里爲武宗諸后曰荅兒罕以功賜號拔都兒荅兒罕子



曰不只兒從征乃顏禽其黨金家奴與有功獲賞金帶又有太不  
花者亦特僻禪之裔孫也別有傳而仁宗莊懿慈聖皇后亦宏吉  
刺氏竟失其世系自太祖取金中都分封諸王外戚功臣宏吉刺  
氏分賜故遼祖慶等州包有潢河荅里海子諸地爲食邑至元七  
年幹羅陳請以駐夏地荅里海子建城賜名應昌元貞元年蠻子  
台又請於應昌東七百里潢塗河閒駐冬地建城賜名全州後爲  
全甯與應昌俱爲路而自達魯花赤總管以下諸官屬皆專任陪  
臣不以朝命也其在中州者太宗八年獲賜濟甯路三萬戶在江  
南者至元十八年復賜汀州路四萬戶武宗又益賜以永平路若  
千戶宏吉刺氏皆得任陪臣爲達魯花赤掌其賦入焉又自魯王  
立復立王傅府王傅六人羣屬有錢糧人匠鷹房軍民軍站營田  
稻田煙粉千戶總管提舉等官七百餘員異姓王得設王傅尤異

數也其後至正時有魯王馬謀沙及明兵破高州追至氈帽山魯  
王被殺獲其妃蒙哥禿史失王名國至是乃絕

孛禿亦曰不圖亦乞列思氏亦乞列思在也兒古納河之西父曰  
捏羣初亦合於札荅刺已而厭之太祖嘗潛遣朮赤台出使至也  
古納河止宿其帳孛禿知其爲太祖使也刲羊享朮赤台復假以  
良馬朮赤台還禮益厚朮赤台具以告於太祖太祖大喜遣人許  
以女弟帖木倫公主妻之孛禿宗族也不堅歹等因詣太祖盛陳  
威德願得依附之意太祖問孛禿孛禿畜幾何對曰有馬三千匹請  
以半爲聘太祖曰婚姻而論財是商賈矣昔人有言同心實難我  
方有事三河汝亦乞列思之民從孛禿效忠於我可也遂以帖木  
倫公主歸之孛禿自是遂附太祖塔塔兒等諸部之立札木合爲  
局兒汗孛禿實告其謀復帥部眾擊虜其輜重降其民旣而太祖



爲克烈王汗所驚走班朱尼河而孛秃亦爲火魯刺思所敗西奔  
適與太祖遇因同飲渾河王汗平孛秃復以兵從攻乃蠻滅之帖  
木倫公主薨太祖復妻以女火臣公主是時火魯刺思亦降曰哈  
兒八秃者其酋也太祖命其子也哥忽林圖爲孛秃侍哈兒八秃  
怒曰吾兒豈能爲人臣僕雖死不爲也太祖命孛秃討其抗命哈  
兒八秃令月列等拒戰于碗圖河孛秃直前禽月列斬也哥忽林  
圖哈兒八秃走渡拙赤河復禽之盡平其眾後從太師國王木華  
黎略地遼西復帥師討定清滄河間之叛以功封冠蓋州久之從  
太祖征西夏還太祖崩不踰月孛秃亦薨太宗命歸葬本土乞只  
兒仍禁其地三年如國制八年分賜火臣公主東平路一萬三千  
戶以食其子孫

子帖堅干事太宗爲萬戶使尙亦乞列思公主爲駙馬公主薨繼

室以茶倫公主帖堅于南征取葭州降其民師還薨于道

弟鎖兒哈襲萬戶尙安秃公主爲駙馬生女明里忽都魯爲憲宗  
諸后鎖兒哈薨

子札忽兒臣襲萬戶從定宗出討蒲鮮萬奴有功太宗命尙按只

吉歹大王女也孫眞公主爲駙馬札忽兒臣薨

子月列台襲萬戶尙哈荅罕公主爲駙馬月列台薨

弟忽憐襲萬戶尙憲宗女伯雅倫公主爲駙馬河平王昔里吉及  
脫帖木兒王之叛忽憐大戰敗之世祖嘉其功復命尙宗女不蘭  
奚公主尋命以江南廣州路二萬戶益食亦乞列思氏乃顏大王  
反合丹大王和之平章政事辭闡于與戰於程火失溫合丹眾甚  
盛忽憐以兵二百衝陣師進遂敗之合丹走渡猱河還其巢穴明  
年忽憐及濟甯郡王帖木兒御史大夫玉昔帖木兒復征合丹至



貴烈那兀兒二河之間大敗其眾而忽憐獨以二百人徒步追殺其逃匿者百餘人後復擊敗合丹之兵於兀刺河賜拔都兒號鈔五萬貫金錠一銀錠十忽憐薨

子阿失襲萬戶大德五年從懷甯王擊叛王海都篤哇篤哇與大軍相持於兀兒秃牀兀兒與玉哇失以精銳馳其陣阿失射篤哇中其膝號而遁懷甯王賜之衣成宗加賜珠衣封昌王賜金印獸紐置王府官屬延祐五年仁宗置甯昌府以爲昌王分地或曰阿失之封在延祐四年未之詳也自阿失封昌王於是自孛秃以下皆追封昌王贈太師開府儀同三司上柱國賜諡孛秃曰忠武鎖兒哈曰武定札忽兒臣曰忠靖忽憐曰忠宣阿失尙成宗女亦里哈牙公主封昌國公主於是自亦里哈牙以上皆號昌國大長公主乃降亦乞列思氏公主皆曰昌國公主位焉亦里哈牙公主薨

繼室以憲宗曾孫女買的公主阿失薨

子八刺失里襲昌王尙煙台牙公主爲駙馬公主亦曰昌國大長公主八刺失里薨

子沙藍朵兒至順元年封懿德王尙月魯公主爲駙馬後復襲昌王亡其封年公主亦曰大長公主

忽憐弟鎖郎哈尙安西王女奴兀倫公主爲駙馬生女爲武宗妃實生明宗諡曰仁獻章聖皇后忽憐又有從弟曰不花父曰帖木干帖木干未知誰子也不花尙世祖女兀魯真公主爲駙馬不花弟曰唆都哥尙魯魯罕公主爲駙馬至元二十二年封甯昌郡王銀印龜紐發民二萬七千戶與之公主薨繼室以魯倫公主唆都哥薨子不鄰吉歹襲甯昌王尙普顏可里美思公主爲駙馬阿刺兀思剔吉忽里一曰阿刺忽失的吉惕忽里一曰阿刺忽思



的乞火力汪古部酋白達鞞種也白達鞞卽察罕塔塔兒故其先亦爲祖卜其自云系出沙陀雁門節度之後非其實也汪古亦曰雍古亦曰王孤地在古雲中定襄陰山之隅與塔塔兒分部居世事金爲忠赤大定中於天山舊權場置縣曰天山復置淨州治焉汪古種類多附此後金人復築邊牆塹山爲界汪古遂守關門以其忠赤也泰和三年太祖旣平克烈乃蠻太陽汗以漠北與國惟蔑里乞存然亦屢敗不可振而汪古在漠南國完善謂可資爲右翼以敵太祖也因遣使說阿剌兀思剔吉忽里部衆有欲相從者阿剌兀思剔吉忽里不聽遂執其使奉酒六尊以其謀告太祖時蒙古未有酒也太祖酬以馬五百羊一千禮使者還遂約同攻太陽汗阿剌兀思剔吉忽里先期至旣平乃蠻從伐中原復爲鄉導南出界垣自是金門戶開矣然太祖留阿剌兀思剔吉忽里歸鎮

本部以防後路而阿剌兀思剔吉忽里竟爲部人昔異議者所殺長子不顏昔班竝死孛要合其幼子也其妻攜之與其兄弟子鎮國夜遁至界垣門已閉告守者繼以登因避地雲中太祖旣定雲中購求得之賜予甚厚然孛要合尙幼乃封鎮國爲北平王佩螭紐金印使長其國太祖常攜孛要合自隨及鎮國薨孛要合年已十七遂襲北平王尙太祖女阿剌海別吉公主爲駙馬仍約世爲婚姻號安達忽荅公主明睿有智略車駕征西域命南駐雲中得秉大政號爲監國公主木華黎之降東平山東東西路略定公主遣使勞之於青冢宴賚有加並大饗將士時人皆歎其威然久未有子公主輒廣進姬妾於孛要合生三子曰君不花曰愛不花曰拙里不花公主皆視如己出孛要合薨公主復攝汪古事然日多誦經漠然忘其爲富貴也太宗八年賜食高唐州二萬戶



君不花尙定宗女葉里迷失公主爲駙馬從憲宗征蜀敵有據險張蓋而詬者恃弧矢莫之及君不花一矢顛之遂下其壘君不花薨子曰囊家台亦曰囊家餽尙亦憐真公主爲駙馬囊家台弟曰邱鄰察亦尙宗王阿直吉女回鶻公主爲駙馬囊家台薨子曰馬札罕

愛不花尙世祖女月烈公主爲駙馬擊阿里不哥有功平李璫爲特將後又征叛王撒里蠻敗之於孔吉烈世祖復以柳州路二萬七千戶益汪古氏愛不花薨

子闊里吉思尙裕宗女忽答迭迷失公主爲駙馬公主薨繼室以成宗女愛牙迷失公主方世祖時也不干大王叛附於乃顏闊里吉思以千餘騎連日夜追及之時暑將戰北風大起左右請待之闊里吉思曰當暑而風此天贊我也策馬赴之會土土哈之師亦至遂殲其眾也不干僅以數騎遁去闊里吉思身中三矢斷其髮凱還詔賜黃金三斤白金千五百斤成宗卽位封闊里吉思爲高唐王授駝紐金印由是追封阿剌兀思剔吉忽里以下三世皆高唐王而諡阿剌兀思剔吉忽里曰忠武孛要合曰武毅愛不花曰武襄又封愛牙迷失爲齊國公主由是追封公主自阿剌海以下皆曰齊國大長公主又諡君不花曰忠襄囊加台曰忠烈邱鄰察曰康禧而闊里吉思弟阿里八餽尙宗王完澤女奴倫公主阿里八餽弟朮忽難尙宗王兀魯餽女葉絲干真公主俱爲駙馬葉絲干真公主薨朮忽難又尙宗王柰刺不花女阿實禿忽魯公主天家世婚幾與宏吉刺氏埒矣闊里吉思有文武才力篤經術築萬卷樓於私第日進諸儒討論經史性理陰陽術數靡不該貫而天性忠懇海都篤哇久相煽亂闊里吉思憤恨之再三請往討帝乃



許之行則誓曰吾不克平金山吾馬首不南也大德元年遇敵於伯牙思眾謂宜俟大軍至乃戰闊里吉思曰丈夫報國而待人耶卽鼓眾以進敵出其不意大敗之禽其將卒百數以獻詔賜世祖所御貂裘寶鞍及贈錦七百介冑戈戟弓矢明年秋諸王大將共議曰敵往歲不冬出且可收兵闊里吉思曰不然今秋候騎來者甚少此鷲鳥將擊匿其形也乃獨嚴兵以待之及冬果大至闊里吉思三戰三克然諸軍皆以無備倉卒不能前闊里吉思乘勝深入孤軍無後繼又馬蹶遂被執海都誘使降闊里吉思正言不屈已而又欲以女妻之闊里吉思曰我帝甥也汝敢甥我乎竟不屈死闊里吉思薨時子朮安尙幼帝命朮忽難襲高唐王而闊里吉思仍駙馬都尉王高唐諡忠憲加贈推忠宣力崇文守正亮節保德功臣太師開府儀同三司上柱國至大二年朮安已尙晉王女

阿刺的納八刺公主爲駙馬而武宗欲進封朮忽難爲趙王朮忽難辭曰臣所襲臣兄闊里吉思爵也今兄子朮安已成立幸婚帝室臣敢久據而不歸乎帝允其讓卽封朮安爲趙王授獸紐金印立王傅府而封阿刺的納八刺爲趙國公主於是自孛要合以下皆進封趙王而齊國公主皆進號趙國凡公主降汪古氏者輒名曰趙國公主位焉初闊里吉思旅殯於卜羅地甚荒遠朮安旣受爵以歸葬請帝嘉其孝許之馳驛往啟視體如生人以爲忠赤之感也後朮安薨失其年而阿魯禿以元祐元年襲封趙王阿魯禿薨並失其年世而馬札罕復以泰定元年襲封趙王

馬札罕尙桑哥八刺大長公主爲駙馬旣襲王封益自修飭致和元年天順帝卽位懷王犯順據大都馬札罕起兵勤王十月及湘甯王八刺失里克冀甯威聲甚震旣而帝被弑馬札罕北還馬邑



爲大都將也速帶兒所襲執未知所終至順閒有趙王不魯納以其封地沙淨德甯飢命賑之至正時又有趙王八都帖木兒其世皆未聞是時有昔班帖木兒先事趙王爲同知怯憐口總管府事其妻亦嘗保育趙王及部落滅里叛欲殺王昔班帖木兒乃以其子觀音奴服王服居王宮而自與妻衛王微服夜遁賊遂殺其子而王免於是天子詔授昔班帖木兒同知河東宣慰司事其妻封雲中郡夫人觀音奴亦贈同知大同路事仍旌其閭然卒未知趙何王也

拙里不花子火思丹尙宗王卜羅出女竹忽眞公主爲駙馬  
鎮國子聶古得尙睿宗女獨木干公主爲駙馬未知何時襲北平王進封爲郿王授獸紐金印薨其後武宗嘉朮忽難之讓復以朮忽難襲郿王薨諡忠襄其後皆無聞

忽都合別乞亦曰忽禿阿別乞曰忽禿花別吉大石斡亦刺酋也斡亦刺有大石斡亦刺比萬斡亦刺諸種等名亦曰外刺曰猥刺居也兒的石河上東接乃蠻西接哈刺魯其北接禿巴思皆號林木中百姓乃蠻之與太祖戰於納忽山下忽都合別乞實帥師助乃蠻以抗太祖已而兵敗遁去太祖二年以旣平乃蠻乃命朮赤北征林木中百姓以帶不花爲前鋒而大石斡亦刺首當其衝忽都合別乞已憚兵威於是與比萬斡亦刺率先迎降且請爲鄉導至亦黑失剔斡亦刺禿巴思諸種皆降朮赤遂定乞力吉思而還太祖以忽都合別乞先眾效順乃命其子亦納列赤尙皇女闊闢干公主亦曰扯扯亦堅公主亦納列赤亦曰脫亦列赤又命亦納列赤兄哈荅尙朮赤女火雷公主哈荅一名脫劣勒赤兄弟俱爲駙馬尋以林木中吐麻反吐麻酋歹都禿勒已死其妻孛脫灰荅



兒渾猶拒命太祖乃命忽都合別乞往說之孛脫灰荅兒渾不從  
竝執忽都合別乞太祖怒興師討之吐麻平忽都合別乞歸太祖  
已虜得孛脫灰荅兒渾卽以賜之太宗八年命食以延安萬戶忽  
都合別乞裔孫有曰禿滿荅兒尙世祖孫女脫脫灰公主有曰別  
里迷失曰沙藍俱尙公主又有也不干尙延安公主卽封延安王  
授駝紐金印自是凡稱降斡亦刺氏公主皆曰延安公主位焉其  
後斡亦刺至元末寢強史失其世莫之悉也

論曰元家后族惟宏吉刺氏亦乞列思氏閒見而已亦乙室拔里  
徒單烏古論之續矣而彼穰有作亦少新特史言憚國公主位自  
赤窟尙禿滿倫公主爲駙馬赤窟一曰赤駒一曰出古一曰赤苦  
與拖雷太子攻宣德先登者也其孫曰懷都尙益吉八忽公主曰  
愛不哥尙采眞公主而愛不花子昌吉尙忙哥台公主以至元二

十四年封甯濮郡王銀印龜紐公主至封鄆國大長公主是爲鄆  
國建號之由當太宗時分濮州三萬戶至元時又數分橫州四萬  
戶數皆與魯國同而優於趙昌此必赤窟功有過人者矣昌吉在  
至元亦從朮白大王北征頗奏膚公昌吉弟脫脫木兒尙桑哥不  
刺大長公主以大德十年改濮陽王延祐四年遂進岐王後瑣南  
管卜復封岐王至於元亡而岐王朵兒只班爲明兵所敗遁是闕  
閱累世不絕惜莫能詳其氏族本末也延安公主本與脫烈公主  
同稱而延安食邑差埒昌國故竝錄焉其自脫烈公主之於哈刺  
魯也立可敦公主之於高昌忽都魯堅迷失公主之於高麗皆卓  
然鬱爲大國足自立也故別爲篇若夫阿昔倫公主帶魯罕公主  
之屬塔出駙馬特木台駙馬之倫益無所徵則闕焉耳矣



廣東鍾大雋

刊

山西劉思永

門人曾紀培襄校

門人曾士琮詳校

元書卷八十五

元書卷八十六

邵陽曾廉撰

段興智阿察楊邦憲田景賢列傳第六十一

段興智故大理國王也大理本唐南詔自號大蒙國治羊苴咩城後倚黔蒼山前為洱海上下為龍首龍尾關後改大禮國五代晉時段思平更號大理前事已具宋史大理傳元初地東與故羅殿自杞國接西北與吐蕃接南與安南車里金齒諸夷接憲宗三年世祖受命伐大理時興智已微弱國事皆決於其臣高祥世祖遣使諭降祥殺之因遁去世祖既破大理興智降追高祥於姚州殺之乃留大將兀良合台戍守命劉時中為大理宣撫使仍命興智同安輯其民明年興智與其季父信苴福入覲詔賜金符使歸國興智遂獻地圖請悉平諸部並條奏治民立賦之法憲宗大悅賜



名摩訶羅嵯命悉主諸蠻爨等部以信苴福領其軍興智遂委國任其弟信苴日自與信苴福帥爨爨軍二萬爲前鋒導兀良合台討平諸部之未服者六年再入朝復導兀良合台攻降安南尋卒信苴日以中統二年入覲世祖賜以虎符仍領大理善闡威楚統失會川建昌騰越等城自各萬戶以下皆受其節制至元元年烏蠻長舍利畏結威楚統失善闡及諸爨皆殺守將以叛善闡屯守官不能禦遣使告急信苴日率眾進討大敗之於威楚寶滿裔復遣孛羅攻之於統失城又大破之遂定統失其秋舍利畏又以眾十萬謀攻大理詔都元帥也先與信苴日討之師至安甯遇舍利畏擊破走之遂復善闡降威楚定新興進攻石城肥膩皆下之爨部平三年錄功賜金銀衣服鞍勒兵器十一年賽典赤瞻思丁平章雲南政事更定諸路名號以信苴日爲大理總管舍利畏復叛

信苴日遣石買等詭爲商旅執贄往見挺矛撞殺之梟首於市得賜金及金織文衣於是威令行於西土郡縣守令賦役政化與中州等矣十四年緬國擁象騎數萬入金齒南甸向騰越是時信苴日方與大理蒙古萬戶忽都伐蒲驃等部干額總管阿朮來求援信苴日兼程赴之遇於河信苴日以寡擊眾大破其兵以功授大理蒙化宣撫使十八年以其子慶俱入覲帝嘉之進大理威楚金齒等處宣慰使都元帥留慶宿衛東宮尙公主尋拜信苴日參知雲南政事明年詔同右丞拜荅兒迎雲南王征緬之師卒於金齒信苴日本名段實治大理凡二十三年至爲忠勤弟忠襲其職自是段氏復世有大理而雲南王治善闡亦藉段氏扞衛西邊忠亦能勤於職事有戰伐功卒慶襲數年卒忠子正襲正卒慶子隆襲傳數世隆子曰光襲職時雲南王府從官諸人多驕恣漸凌段氏



光遂憤恨因而成隙至大開老的罕為雲南王遂帥師相攻光迎戰而敗慮王襲之以重兵守羅那關雲南境土分矣順帝至正四年光弟功襲已而明玉珍據蜀分兵攻雲南梁王把匝刺瓦爾密走威楚徵兵拒玉珍功進兵呂關破蜀兵於關灘玉珍屯古田寺功夜遣人火之蜀兵多死復大破之於回磴關又追敗之於七星關玉珍走還重慶梁王深德功妻以女奏授雲南平章政事未幾以疑殺功子寶襲蜀兵復來侵梁王復求援於大理寶以父仇卒不出兵居數歲梁王殉國寶已卒子世襲明兵入大理世就擒阿察羅氏鬼國酋也羅氏鬼國漢牂柯夜郎縣地隋為牂柯縣在唐為牂柯蠻開成時有鬼主阿珮內屬宋初有曰武才雨滯者稱順化王美其名也元興世祖克大理羅氏鬼國尚忠於宋遣人報思播言元兵將入邊宋令思播同羅鬼備禦之至元十五年湖廣

行省遣兵攻殺湖南制置張烈良提刑劉應龍於烏羅洞阿察大懼乃求內附世祖以為其地安撫使亦謂之亦奚不辭亦奚不辭元人之稱羅氏鬼國者也既而以其憚入朝將討之安西左丞李德輝適至播使往招之阿察乃聽命詔改鬼國為順元路阿察為宣撫使德輝遣人偕之入覲阿察復不行辭以病而遣其從子代之帝曰亦奚不辭不稟命輒以職授其從子無人臣禮遂命四川都元帥也速答兒征之大破之於沙溪西又破其黨阿永蠻於鹿札河盡平其地立三路達魯花赤留軍鎮守其酋阿利入朝師乃還立亦奚不辭總管府尋復立順元宣慰司屬湖廣行省順元中有大江曰黔江漢江延江合於漢水者也亦有黠水入焉即黔水也後遂專黔之名矣其水亦曰烏江唐人所謂涪陵江亦此水也水西之地東至播州南至羅甸西至烏撒芒部北至阿永蠻阿察



之族主之水東之地南至播州北至八番東至葛蠻西至羅甸則宋氏主之宋氏者唐蠻州刺史宋鼎之後唐時有清州刺史宋朝化其宗也元以阿里爲亦奚不辭總管宣撫使而宋添富爲亦奚不辭千戶元貞元年改其地屬雲南行省大德五年雲南左丞劉深帥師征八百媳婦出順元索民供餽水東土官宋隆濟因給其眾曰官軍徵發汝等將盡髮黥爲兵身死行聞妻子爲虜矣眾惑其言遂反是時水西土官之妻曰蛇節以深脅取其金及馬亦同隆濟以叛遂攻順元城貴州知州張懷德戰死圍深於谷梁王松山遣雲南平章政事幢兀兒來援斬首五百級深始得出明年詔陝西平章政事也速答兒湖廣平章政事劉國傑將兵討亦奚不辭七年劉國傑師出播州大敗蛇節於墨特川誅蛇節宋隆濟遁去順元宣撫同知宋阿重至水東招諭木樓苗佬獲隆濟以獻亦

奚不辭乃平賜阿重衣特升其官久之阿察之裔仍專有順元遂世襲順元等處宣撫使八番等處沿邊宣慰使仁宗之世有阿畫者亦名帖木兒不花嗣職以洞蠻酋黑冲子子昌奉方物來覲至順元年以雲南梗命進阿畫爲雲南左丞從豫王阿刺忒納失里討之會烏撒祿余以蠻兵壓順元界爲關祿余者世爲烏撒酋烏撒故晉時五茶夷也方雲南諸王秃堅萬戶伯忽之不臣文宗也祿余亦殺烏撒宣慰使應伯忽復乘勢連結烏蒙東川芒部以攻順元四川平章政事塔出出永甯左丞羅孛出青山茫部陳兵周泥驛六日凡十七戰祿余大敗潰去卽奪其關導順元軍明年躍里帖木兒射中祿余降其民祿余愈復寇順元阿畫禦戰雲南行省授祿余參知政事制命都司那海就陣宣詔招諭遇害阿畫斂兵還三年四川行省言祿余訴自父祖代爲烏撒土官宣慰司使



佩虎符今違朝廷招諭之期乞再降赦詔改屬四川隸永甯路詔省院臺雜議從之祿余降烏撒與烏蒙茫部阿永蠻皆羅羅種也故嘗與亦奚不辭狼狽爲寇自文宗善撫阿晝月魯帖木兒王遂得據烏江遏四川囊加台出播之師豫王亦得自八番道進兵討雲南順元爲西南要地矣初至元時八番與羅氏同請內附十六年以龍文求爲臥龍番南甯州安撫司使龍方零爲小龍番靜蠻軍安撫司使龍延三爲大龍番應天府安撫司使程延隨爲程番武勝軍安撫司使洪延暢爲洪番永盛軍安撫司使石延異爲金石番太平軍安撫司使盧延陵爲盧番靜海軍安撫司使羅阿資爲羅番邊蠻軍安撫司使並授懷遠大將軍佩虎符仍以兵三千戍之前史又言韋昌盛爲方番河中府安撫司使方番自當以方氏領之然韋番僅稱蠻夷長官而韋氏得領方番未之詳也八番

在順元南不百里不過一縣之地其相去不過數里遠亦止數十里而侈以軍州府司之名又爲之立宣慰司都元帥府二十六年斡羅思爲宣慰使上言招到羅甸國札哇諸種蠻夷四萬六千六百戶遂立八番羅甸宣慰司使二十九年中書省奏曲靖宣慰同知托因言羅甸卽普里也隸雲南已三十餘年賦役如期今斡羅思擅以兵脅降勒令入覲邀功希賞乞罷之於是乃以羅甸還雲南而改宣慰曰八番順元宣慰司使其後八番遂爲阿晝所兼領矣故阿晝日盛大元統二年伯顏不花復襲父職爲順元等處軍民宣撫使八番等處沿邊宣慰使阿晝後也元亡與宋氏俱降明楊邦憲宋故播州安撫使也播州在漢爲犍縣唐爲播州朝官以爲非人所居遂淪於夷宋大觀時楊光榮楊文貴獻地一居遵義一居播川皆自以爲播州朝以光榮得唐給州銅牌而爲族長遂



以爲播州文貴得州銅印以爲遵義軍其後俱廢嘉熙三年復設播州於遵義以文貴後充安撫使邦憲父曰文嗣其職兼知播州宋主以其守禦勤勞轉一官卒邦憲嗣父職至元十三年來附明年邦憲言本族自唐至宋世守此土將五百年蒙恩旣許復舊乞降璽書從之旣而邦憲卒子漢英字熙載甚幼母田氏攜之至上都見世祖於大安閣世祖呼漢英至御榻前熟視其眸子撫其頂者久之命襲父職佩金虎符而賜之名曰賽因不花二十八年賽因不花言向所授安撫隸順元宣慰然地於四川近乞改宣撫隸四川行省詔以爲紹慶珍州南平等處沿邊宣慰使行播州宣撫使管軍萬戶復拜侍衛親軍都指揮使仍佩虎符大德元年請以己力討平未服諸蠻詔湖南行省便宜招撫五年順元宋隆濟蛇節反明年會湖廣平章政事劉國傑討之國傑師出播賽因不花

先進敗之於蹉泥遂降阿苴下笮籠七年進屯暮窩大破蛇節於墨特川事具國傑傳後以盧崩蠻內侵帥師致討卒於軍贈推誠秉義功臣銀青光祿大夫平章政事柱國播國公諡忠宣漢英清亮威毅兼工文翰著述在藝文志子嘉貞襲職至治二年來朝賜名延里不花亦曰燕里不花曰也里不花其後泰定二年其州黎平愛反三年延里不花招之來降未幾復合謝烏窮以叛延里不花仍招降平愛而討烏窮平之已文宗入京師而自立四川平章政事囊加台不從命遂興師破其州苗兒埡延里不花納之導其軍至烏江尋以囊加台敗仍舉境降至正十三年延里不花遙授湖廣左丞以楊伯顏不花爲紹慶宣慰使換文資楊城爲沿邊溪洞招討使其後曰楊鑑嗣職元亡降明

田景賢故宋思州安撫使也唐思州久廢宋政和未復立尋亦廢



宣和時田祐恭附宋得世有思州景賢父曰應庚與播州田文俱爲安撫使世祖下大理兵漸東向應庚文同助宋爲邊備至元十二年四川行省管順言思州安撫使田景賢播州安撫使楊邦憲乞降詔許之世襲而遣兵戍其土十五年景賢邦憲請撤戍卒而歸宋借鎮遠黃平二城不允請降詔禁戍卒無擾民許之尋改宣撫使復改宣慰使兼管內安撫使初唐思州治務川在涪陵江東宋時仍之宋季徙龍泉平在清江南唐安徽水也以火其城徙臨清江至元十七年命還治龍泉其時思播兵侵鎮遠黃平界帝命李德輝往視之命黃平隸安西行省鎮遠隸潭州行省旣而田楊日漸拓大元貞元年思州田曷刺不花入朝仁宗時盧崩蠻爲寇宣慰使田茂忠與播州楊漢英連兵討之泰定四年田仁爲思州宣慰使楊氏旣世擅土地於是務兼并疆域越鎮遠矣元季思州

得轄及舊錦獎敘並與溪施錯云元亡亦降明

論曰余讀漢書西南夷傳始嘗疑之夫其時亦立益州牂柯郡矣何以列多同等於夷惟其侯王之名猶存則仍夷也元於段氏阿察楊田皆授以流官與漢世異矣而時若新添葛蠻阿永諸蠻蓋不可得而考其酋之氏族本末也故遂闕焉余又考羅甸爲唐牂柯別帥所封本曰羅殿王其在元爲普里或者以爲羅甸封王自漢始又以爲在水西不亦罔乎



曾翊廷

廣東鍾大雋 刊

山西劉思永

門人曾淑身襄校

門人曾士琮詳校

元書卷八十六

元書卷八十七

邵陽曾廉撰

畏吾兒哈刺魯高麗土蕃列傳第六十二

畏吾兒亦曰畏兀亦曰委兀曰畏午曰偉兀唐回鶻也其先本匈奴之族唐初名回紇後請改回鶻焉其時都和林河上突厥故庭屢發兵爲唐討寇可汗多尙公主唐末黠戛斯破之回鶻遂分崩其西徙甘沙者宋史仍謂之回鶻其別徙高昌故地宋史以爲高昌國元時皆寢譌爲畏吾兒而在甘沙者則曰河西畏吾兒高昌畏吾兒亦曰西州畏吾兒而當時名其地曰火州並統別失八里之地北至亦列河東接河西西至眞珠河南連鄂端土蕃地有水泉可兼種牧其王稱曰亦都護耶律大石之建西遼也其亦都護畢勒哥獻馬駝爲附庸其後亦都護曰月仙帖木兒月仙帖木兒



子曰巴而朮阿而忒的斤巴而朮阿而忒的斤亦曰八兒出阿兒  
忒以西遼待之輕漸不樂知太祖興朔方可倚以自固也於是乃  
殺西遼監治官太師僧少監而請降太祖適是時蔑里乞汗脫脫  
子霍都等將奔畏吾兒巴而朮阿而忒的斤大戰卻之事在蔑里  
乞傳六年遂以金寶入貢朝於怯綠連行宮因上言已臣乞與於  
四子之末俾竭其犬馬之力太祖遂使尙公主也里安敦許序於  
諸子焉已而爲乃蠻所擾亂太祖西征旣破瀚海軍復戰於高昌  
敗之於是畏吾兒始靖巴而朮阿而忒的斤乃以萬人從哲別那  
顏擊滅里鎖檀汗又從征尼沙不兒征河西皆有大功後以其國  
隸于闐王國兼轄焉巴而朮阿而忒的斤薨子玉古倫赤的斤嗣  
玉古倫赤的斤薨子馬木刺的斤嗣馬木刺的斤嘗將萬人從憲  
宗伐宋攻釣魚山還國薨至元三年世祖命其子火赤哈兒嗣亦

都護是時遭海都帖木迭兒之亂民多蕩析天子乃命宗王近戚  
凡境有畏吾兒悉還之火赤哈兒遂大輯其眾十二年篤哇卜斯  
巴以兵十二萬圍火州聲言曰阿只吉奧魯赤諸王以三十萬之  
眾當我猶潰况爾孤城乎火赤哈兒曰吾聞忠臣不事二主吾生  
以此城爲家死以此城爲墓也圍六月不能下篤哇以書繫矢射  
城中曰我亦太祖孫也何外我且爾祖嘗尙公主爾能以女與我  
則休兵不然則急攻爾畏吾兒之民相與言曰城中食且盡攻不  
止則相與俱亡矣於是火赤哈兒曰吾豈惜一女而不以救吾民  
乎然吾終不能與相見以其女也立亦黑迷失別吉厚載以茵絙  
城下而與之篤哇乃解去其後火赤哈兒入朝帝嘉其忠厚賚之  
妻以定宗女巴巴哈兒公主還屯哈密力遇叛王沒於陣是時火  
州再殘破天子置北庭都護府於火州北置宣慰司及交鈔庫於



火州並立四處軍站又以諸王將相鎮別失八里以遏亂略火赤哈兒子曰紐林的斤請兵以復讐帝壯其志使尙公主布魯罕太宗女孫也公主薨又尙其妹八卜义然帝知火州難猝靖乃命留永昌復命討土蕃脫思麻叛黨遂以榮祿大夫平章政事守土蕃宣慰司成宗立置北庭都元帥府始命復括畏吾兒流民武宗立始召還紐林的斤使嗣亦都護既賜金印仁宗稽故實乃封高昌王別以金印賜之爲設王傳官令以王印行內郡亦都護印行畏吾兒境云後八卜又公主薨復尙安西王女乃刺真公主於是紐林的斤復還火州立城池延祐五年薨子帖木兒不花亦曰帖木兒補化大德中卽尙闕端太子女孫朵兒只思蠻公主至大中從父入覲備宿衛又事皇太后於東朝領大都護事出爲鞏昌都總帥達魯花赤奔父喪請以王讓其叔父欽察台欽察台固辭乃嗣

父位至治中領甘肅諸軍仍治其部泰定初召還尋與威順王寬徹不花分鎮襄陽就拜開府儀同三司平章湖廣政事文宗入京師湖廣左丞馬合某不肯降附被執帖木兒不花與燕鐵木兒爲請而出之其人向不相能也文宗加以上柱國錄軍國重事知樞密院事明年以舊官勳拜左丞相改御史大夫乃遂以其爵讓其弟錢吉襲焉錢吉亦曰藏吉以至順三年薨弟太平奴襲帖木兒不花長子不答失里後爲中書平章政事襲亦都護高昌王尙阿哈也先忽都公主薨子和賞嗣元亡降於明其次子伯顏不花的斤在忠義傳或曰雪雪的斤爲駙馬都尉中書丞相高昌王生朵兒的斤朵兒的斤爲駙馬都尉江浙丞相荆南王生伯顏不花的斤或曰朵兒的斤帖木兒不花是一人也文宗天祿二年以朵兒只亦都護爲河南丞相稱爲先朝舊臣者也其時帖木兒不花方



元書 卷八十七 三  
爲御史大夫至順元年命振舉臺綱是帖木兒不花不爲河南丞相非一人也疑莫能明焉史又載有亦都護高昌王月魯帖木兒以至正十二年將畏吾兒兵同豫王阿剌忒納失里討襄鄧南陽賊明年薨於南陽軍中子桑哥嗣並失其世

哈刺魯一曰匣刺魯曰柯耳魯亦曰合兒魯兀惕唐葛邏祿也居漢匈奴右地及康居東地元魏時曰悅般國在阿力麻里北國有大澤東連也兒的石河西與康里接地苦寒逐水草游牧谷量牛馬本突厥族也初亦役屬西遼太祖旣滅乃蠻遣忽必來帥師征之其汗阿昔蘭懼以眾降太祖封爲郡王領部如故二十年以隸于闐王國兼轄焉阿昔蘭子曰也先不花太祖命尙脫烈公主薨子忽納荅兒尙八八公主薨子納海涯里那尙鐵公主其後延祐三年周王自延安北出金山哈刺魯嗣王納女焉語在后妃傳

高麗三面距海西登萊東南日本長一千五百里廣三四百里始曰朝鮮漢時有曰高句麗者魏晉後漸強後省名曰高麗五代時王建始王其地都松岳前事具宋遼金史各本傳金時北與婆速合懶恤品接元初其王名瞰距建十數世矣太祖十一年遼王耶律留哥之屬金山統古與咸舍等叛留哥南走及爲金師所擊遂以九萬人竄入高麗明年其黨自相殘害咸舍繼總其眾攻據江頭城十三年帝命留哥導元帥哈真副元帥札刺討其叛人東夏亦以兵助留哥兵入其境麟州都領洪大宣降乃同攻江頭城圍之高麗王瞰喜國兵之助其討寇也乃親奉牛酒犒師而遣其樞密院使吏部尙書上將軍翰林學士承旨趙沖共討咸舍滅之由是札刺與趙沖相得甚歡因約爲兄弟而請輸歲貢十四年帝遣蒲里帶也持詔往諭高麗王瞰迎拜設宴焉未幾帝親征西域皇



太弟國王幹曠及哈真札刺各以書遣十人趣其入貢於是連年皆進方物十六年諭以伐女真事高麗始奉表陳賀自是使者相屬著古歟凡四使其國高麗人漸惡其擾十九年盜殺著古歟十人於途帝知罪在高麗而以方遠征未致討也太宗三年乃興師問罪命撒禮塔爲元帥帥師以伐高麗所至迎降師抵王京噉遣其弟懷安公佺請和撒禮塔置京府州縣達魯花赤七十二人監其國遂班師明年噉以設監不便因盡殺所置達魯花赤而率其國人徙江華島於是撒禮塔復征之逾王京而南至處仁城中流矢卒列將鐵哥以軍還噉尋遣將軍金寶鼎上表陳情詔諭噉悔過來朝且數其五罪噉不奉詔而悉眾攻陷已附西京諸處降民劫洪大宣以去帝怒命唐古拔都兒吾也而及大宣子福源進討拔其十餘城噉復遣金寶鼎等奉表來貢復徵噉入朝噉懼以

母喪辭自是屢遣其臣納貢而國兵亦屢攻之不輟高麗日漸蹙於是詔諭噉必親朝噉不得已以族子綽爲己子入質尋復闕貢定宗命阿母罕征之憲宗申命也苦大王及札刺兒帶累歲討高麗高麗地益削八年噉計窮乃遣其世子僎入覲會憲宗親伐宋入蜀遂崩未之禮也中統元年噉遂物故世祖始卽位廉希憲趙良弼請改館僎而送之歸國帝從之命以兵衛送僎仍赦其境內僎求去水就陸以免軍國侵擾許之尋遣子永安公僖來賀卽位以國王冊印及虎符賜之明年夏僎來朝尋更名禎三年賜禎中統秣詔諭禎籍編民出師旅輸糧餉助軍儲禎初置不荅帝詰其使者禎表俟民生稍集然後惟命帝謂其辭意懇實如其請歲進方物亦命止稱其力仍諭高麗上京等處毋重科斂禎以免置驛罷互市蠲酒課諸事遣翰林學士韓就入謝賜蜀錦一羊五百至



元元年正月朔禎遣使賀正旦六月朝於上都修世見禮命頒改  
元詔及赦令於其國禁登州和州竝女真侵高麗界帝聞禎病親  
和藥賜之明年春禎遣其弟公珣入貢六月遣使來賀聖誕歲如  
例終世祖世入貢三十六會朝正者二十年謹守藩臣禮焉三年  
帝欲通好日本以高麗可爲鄉導諭禎使送國信使黑的至日本  
禎知日本驕慢初遣使導黑的不至而還明年繼復辭黑的而遣  
其臣使日本書亦不達事在日本傳然帝以爲禎欺飾五年特遣  
北京總管于也孫脫等持詔諭禎以將問罪於宋當助士卒具舟  
艦積糧儲禎遣其門下侍郎李藏用入朝帝敕藏用曰歸諭而主  
速以軍數實奏且當造舟千能涉大海可載四千石者藏用曰舟  
艦敢不如命但人民殘少恐不及期往者臣國有軍四萬年來死  
於兵疫賴聖德撤兵今生長者十歲耳帝隨命都統領脫朵兒王

國昌等至其國督軍造船禎出迎願備兵一萬船千艘詔脫朵兒  
王並相視黑山道路帝仍詔高麗送黑的赴日本日本卒不納而  
還六年高麗令公林衍廢禎而立其弟安慶公湄其世子懃泣奏  
於朝帝遣幹朵思不花李諤等至其國詳問且敕萬戶宋義督兵  
往討兼授懃特進上柱國假師三千以赴國難湄遣其樞密副使  
金方慶至表訴國王禎遘疾令湄權國事帝知事皆構自林衍乃  
召禎湄衍同赴闕面訴情實更命國王頭輦哥以兵壓其境違命  
者則勦戮又命趙璧行省東京仍詔諭高麗軍民高麗都統領崔  
坦等遂挈西京五十餘城人附帝命樞密院臣議征高麗事初戶  
部尙書馬亨言高麗本箕子所封漢晉皆爲郡縣今雖來朝其心  
叵測莫若嚴兵假道以取日本爲名乘勢襲其國仍郡縣之至是  
又言今既有釁端不宜加兵萬一不勝上損國威下損士卒彼或



元書 卷八十七 六  
上表言情宜赦其罪戾減其貢獻安撫其民使之感慕聖化俟宋平之後彼有他志回兵誅之未晚前樞密院經歷馬希驥亦言今之高麗乃古新羅百濟高句驪三國所併大抵藩鎮權分則易制諸侯強盛則難臣驗彼州城軍民多寡離而爲二分治其國俾權侷勢均自相維制斯亦良圖也會祖已受詔復位明年二月親朝京師從者七百人詔以三百人留西京而改西京爲東甯府畫慈悲嶺爲界以蒙哥都成其西境帝恐高麗軍民疑懼乃降詔所討惟林衍安慶公涓本非得已在所寬宥餘皆誣誤一無所問尋遣兵送祖就國命居舊京設達魯花赤同鎮撫之並敕兵士無擾其國林衍時已死子惟茂自稱令公亦爲其下所殺衍黨裴仲孫招集餘眾立庶族承化侯爲王劫府庫圖籍竄入珍島大軍次王京西關城遣人收繫林衍妻子行省初與祖議遷江華島民於王京

祖不從至是入居舊京乃從行省之議尋又設屯田經略司以忻都史樞爲鳳州等處經略使佩虎符領兵五千人又命洪茶邱以舊民二千人並往屯田以鎮高麗而詔諭祖以發卒屯田爲進取日本計庶免爾國轉輸之勞仍先遣使招懷可裨贊方略八年忻都等破珍島斬承化侯其黨金通精走耽羅祖遣上將軍鄭子璵奉表謝並以世子懋率其尙書右承宋玠軍器監薛公儉衣冠世胄二十八人入侍祖先遣樞密使金鍊奉表請結昏帝遣懋還國而許其昏祖復表謝其歲祖遣通事別將徐稱送國信使趙良弼至日本明年祖復致書日本使通好於朝十年忻都等拔耽羅誅通精祖上言國小歲歉乞以生券軍駐東京詔令營北京界仍運東京路米二萬石振之是歲懋入朝十一年皇女忽都魯揭里迷失下嫁懋詔僉高麗軍五千六百人助征日本七月祖薨帝命懋



還襲位皇女入於高麗懣累上表謝復遣其帶方郡侯王澂率衣冠子弟二十人入侍十三年懣遣僉議中贊金方慶奉表賀平宋奏改名昉十五年金方慶等謀作亂東征元帥府流之海島乞置長吏於忠清全羅諸處仍行屯田命改鑄駙馬高麗王印賜昉而以其官制僭濫諭改正之十六年赦其國置大灰艾州東京柳石孛落四驛十七年昉以民饑乞貸糧萬石從之帝以其國初置驛而乏食命給糧一歲仍禁使臣求索飲食是時帝方用兵日本昉入朝請益兵自效帝大喜加昉開府儀同三司左丞相行中書省事十八年昉言本國置驛四十民畜凋敝赦省其半仍給馬價焉十九年日本惡昉增兵潛出偏師寇掠其邊而去詔立金州等處鎮邊萬戶府率蒙古軍戍之昉憤甚請更造船助征帝益喜賜昉金印竝以耽羅所造戰船給其軍二十年立征東行省昉與右丞

相阿塔海共領省事明年椿及公主率其子諫來朝二十三年遣使獻日本俘十六人詔加昉太保二十六年置高麗國儒學提舉司以其國多產銀遣工卽其地開冶輸官昉歲貢其所產紬布氎布線綢動以千計二十八年昉乞以諫爲世子授特進上柱國賜銀印尙薊國長公主寶塔實憐以國饑給米二十萬斛明年又告饑賜米十萬石三十年昉請更名昉賜號推忠宣力定遠功臣成宗卽位昉入朝詔封皇姑高麗王妃爲安平公主元貞二年授世子諫儀同三司領都僉議司事大德元年昉請老而傳國於諫詔諫襲高麗王別封昉爲逸壽王加太尉然國人不樂諫所爲者因飛讒離間二年中書省奏諫擅命妄殺遣右丞楊炎龍召諫入侍仍以昉爲高麗王昉旣復位委用羣小厚斂淫刑國人羣愬於朝廉得其大臣吳所專權離間狀遣翰林直學士王約驗問約至



元書 卷八十七  
宣布明詔，詎感泣聽命，乃徵祈赴闕，流之安西。更命故臣洪子藩、長僉議，府語具約，傳會哈散，以使還言。詎不能服眾，朝廷當遣官理之。於是復立征東行省，命闕里吉思平章政事。比至上言：國王自署官府三百五十八所，官四千五十五員。王用曲蓋龍屐警蹕，諸臣舞蹈山呼，一如朝儀。詔使釐正之。詎言：昔居海島，實有此儀。今一切皆罷。已革官府汰官吏，省雜徭驛，傳惟訴設行省監治。非便，帝亦以闕里吉思不能和輯其民，仍罷行省。十年，遣使賀正。且五月，詎薨，諡復還襲位。仍置征東行省，諡復爲左丞相。諡請更名璋，亦名益智。禮普化。明年，武宗卽位，加封瀋陽王，授太子太傅。駙馬都尉追諡。徹曰：忠獻。補曰：忠敬。詎曰：忠烈。至大元年，請罷行省。許之。遼陽右丞洪重喜尋奏：璋恣暴，省臣請對狀。帝令無對，而使扈從。太后禮五臺山，尋賜功臣號，進封瀋王。皇慶二年，仁宗遣璋

歸國。璋樂居京師，遂請以其世子壽襲高麗國王位，而自以瀋王留侍。未幾，復請立其弟子延安君嵩爲瀋王。世子皆許之。璋雅好文藝，構萬卷堂於其邸，嘗招致闈復、姚燧、趙孟頫、虞集等與之游。延祐元年，禿忽魯罷相，帝擬用璋。璋固辭曰：臣小國瀋王之寄，猶恐弗勝，乞以付子。况朝廷之上相哉。帝益重之。時有請立帝師，八思巴祠比孔子者。璋曰：師制字有功於國，祀之固宜。何必比之孔子。孔子百世之師，其得通祀以德，不以功。後世恐有異論，聞者躉之。科舉之設，璋以姚燧之言白之。仁宗及李孟執政，遂奏行之。其端實發自璋也。三年，璋復請傳瀋王位於世子嵩，遂請於仁宗降御香南游江浙，至寶陀山而還。英宗卽位，復請降香於江南。旣渡江，帝以蜚語遣使急召赴上都。令騎士擁逼以行。璋侍從皆奔竄，及還，命中書護送。本國安置。璋遲留未卽發，卽下璋於刑部。旣而



祝髮留之石佛寺尋又流之士蕃泰定帝立以大赦得還泰定元年仍以爲瀋王明年五月薨於京邸諡曰忠宣熹襲國王兼征東左丞相亦名阿剌忒納失里初尙濮國長公主亦憐只班營王女也繼尙曹國長公主金童魏王女也泰定三年熹遣使賀正旦天祿二年正旦朝賀復遣使焉是冬熹以久疾不視事請以其子禎襲位至順三年禎復遣賀正旦未幾熹疾愈命仍爲國王賜金印後至元初徵熹入朝厚賜遣還五年薨復以禎襲禎亦名不荅失里至正四年以淫暴無道檻車徵之流揭陽禎性絕乖戾無一人從行者至手持衣袂以去至岳陽而死于昕襲高麗國王征東左丞相亦名八禿麻朵兒只八年薨以禎庶子眠襲眠亦無道十一年遇醜死國人請立禎之母弟祺祺亦名伯顏帖木兒是時日本渡海爲寇自稱島居王祺以討捕功賜金繫腰十四年賜號親仁

輔義宣忠奉國彰惠靖遠功臣會帝二皇后奇氏族人在高麗者多怙勢驕橫祺輒裁抑之不悅則盡殺之由是奇氏日讒祺於帝帝信之二十二年命廢祺而立其弟塔思帖木兒國人上書言祺不當廢不聽復以后族子三寶奴爲元子以兵萬人送之國至鴨綠江爲祺伏兵所敗還者惟七十騎焉曷自璋薨後復襲瀋王尙公主梁王松山女也子脫脫不花至正十年爲東宮怯薛官十四年襲瀋王耽羅一曰儋羅唐麟德時嘗遣使入朝地在高麗西南大海中初附百濟繼附新羅其後高麗以爲濟州亦有酋自通中國世祖旣臣服高麗以耽羅爲南宋日本衝要亦注意焉至元六年都統領脫朵兒王國昌等相視黑山道路並命高麗導送往視耽羅卽於耽羅造船百艘以俟調用八年高麗叛黨金通精走入耽羅明年省院議曰若先有事日本未見其逆順之情恐有後辭



可先平耽羅然後觀日本從否且耽羅國王嘗來朝觀今叛賊逐其主據其城以亂舉兵討之義所先也十年遂命經略使忻都史樞及洪茶邱等帥兵船百八艘討賊拔耽羅城禽金通精詔誅之卽以其地立耽羅國招討司屯鎮邊軍千七百人歲賦毛施布百匹後改爲軍民都達魯花赤總管府又改爲軍民安撫司三十年又立水驛自耽羅至鴨綠江並楊村梅口凡三十所成宗卽位高麗王睿入朝上言耽羅自祖宗以來臣屬本國金通精旣平之後尹邦寶克招討副使以計求徑隸朝廷乞仍其舊帝許之大德二年以方物來貢五年復立耽羅軍民萬戶府

土蕃漢西羌地范史以爲古之三危濱乎賜支至於河首緜地千里南接蜀漢徼外蠻夷西北鄙善車師諸國唐時最盛大至其季遂衰族種分散無復統一矣前事已具唐書宋史本傳元代東爲

朵甘思西爲烏斯藏朵甘思本吐谷渾也東界川陝雲南北界甘沙畏吾兒幹端西界怯失迷兒南界扮卜欣都思地方萬餘里有數水一大江一大河一黑水皆見於禹貢又辛頭河出其國西南流而南環欣都思西而入於海又一河東流而南入於欣都思東合於恆河而蘭倉江亦入南海此其大川也其山亦絕高大爲崑崙之別支三危山在其東太宗時都元帥按竺邇破文州招徠土蕃勘陁孟迦十族亦謂之西蕃憲宗三年世祖受命南伐大理遂自臨洮入土蕃中輒下諸城度雪山涉金沙江其時有八思巴見於軍門遂侍潛邸及卽位以爲帝師授以玉印八思巴亦曰八合思八土蕃撒思迦人族款氏相傳自其祖朵栗赤以其法佐國王霸西海十餘世初釋迦生於欣都思佛法爲大盛土蕃自唐時已崇其法其後經教反盛於欣都思元人尤篤信之世祖經歷土蕃



知其地廣而險遠既重其教又思因其俗而柔其人也乃盡郡縣其地設官分職而統之以帝師爲之立總制院後更名宣政院使使之職掌釋教僧徒及土蕃境有事則爲分院往鎮亦別有印如大征伐則會樞府議其爲使位第二必以僧出帝師所辟舉其用人則自爲選僧俗並用而軍民統攝於是帝師之命與詔敕並行於西土云八思巴又製爲蒙古字凡千餘字以諧聲爲宗至元六年詔頒行於天下其後凡有璽書頒降者並用蒙古新字仍各以其國字別之遂升號八思巴曰大寶法王更賜玉印十一年請告西還留之不可乃以其弟亦憐眞嗣帝師十六年八思巴卒賜號皇天之下一人之上宣文輔法大聖至德普覺眞智佑國如意大寶法王西天佛子大元帝師至治閒特詔郡縣建廟通祀泰定帝又繪像頒各行省令做塑焉亦憐眞亦以至元十六年卒答兒麻

八剌乞列嗣二十三年卒亦攝思連眞嗣三十一年卒乞刺斯八斡節兒嗣成宗特造寶玉五方佛冠賜之元貞元年更賜雙龍盤紐白玉印文曰大元帝師統領諸國僧尼中興佛教之印大德七年卒明年輦眞監藏嗣又明年卒都家班嗣皇慶二年卒相兒加思嗣延祐元年卒二年公哥羅古羅思監藏班藏卜嗣英宗立命詣西蕃受具足戒賜之金千三百五十兩銀四千五十兩幣帛萬匹鈔五十萬貫至治三年卒旺出兒監藏嗣泰定二年卒公哥列思八冲納思監藏班藏卜嗣賜玉印降璽書諭天下其年卒天祚二年輦眞吃刺失思嗣百年之閒每帝卽位降詔褒護必敕章佩監絡珠爲字以賜雖帝后妃主皆往受戒爲之膜拜正衙朝會百官班列帝師專席於坐隅晏如也其迎帝師則中書大臣馳驛累百騎以往所過供億迎送比至京師敕假法駕半仗前導省臺院



官百司庶府並服銀鼠質孫用每歲二月八日迎佛威儀禮部郎中專司迎接及其卒歸葬舍利百官出郭祭餞大德九年專遣平章政事帖木兒乘傳護送賻金五百兩銀千兩幣帛萬匹鈔三千錠皇慶二年加至金五之銀十有五之絲綺雜綵一萬七千匹其昆弟子姓往來有司亦供億無乏泰定閒以帝師弟公哥亦思監將至詔中書持羊酒郊勞而其兄峻南藏卜遂尙公主封白蘭王賜金印給圓符其撒思迦地英宗嘗遣使賜僧金二百五十兩銀十之袈裟二萬幣帛旛茶有差文宗至以珠織制書宣諭其屬仍分賜以鈔四千錠幣帛各五千匹初至元十七年天子命都實爲招討使佩金虎符西求河源河源在土蕃朵甘思西鄙名火敦腦兒譯言星宿海也都實還報集賢侍讀學士濟南潘昂霄景梁得其說撰爲河源志蓋元有天下薄海內外皆置驛傳土蕃城傳位

置都實竝圖焉其所云崑崙實卽唐入所謂大積石禹導河處云然土蕃雖名郡縣其俗實蠻夷往往相聚爲亂自至元時西平王奧魯赤嘗兼督秦王忙哥刺永昌王只必帖木兒兵以征土蕃朝廷兼撫其民亦置榷場於碣門黎州與之貿易元貞二年土蕃叛掠階州命諸王帖木兒不花等討之大德時復寇階州陝西平章脫列伯以兵進討其黨悉平尋併碣門安撫司運司改爲魚通黎雅長河西甯遠軍民宣撫司其時鎮西武靖王搠思班鎮脫思麻撫治土蕃至大二年宣政院言鎮西武靖王搠思班與脫思麻宣慰司言松潘疊宕威茂等處安撫司管內西蕃禿魯卜降胡漢民四種人雜處昨遣經歷蔡懋昭往蛇谷隴迷招之降其八部戶萬七千皆數百年負固頑獷之人酋長令眞巴等八人已嘗廷見今令眞巴謂其地鄰接四川未降者尙十餘萬安撫司官不知蠻夷



事宜纔至成都灌州畏懼卽返何以撫治宜改安撫司爲宣撫司  
遷治茂州徙松州軍千人鎮邊爲便詔卽施行遷宣撫司治茂州  
汶山縣仁宗卽位之年土蕃犯永福鎮命宣政院討之未幾復寇  
禮店文州命總帥亦憐眞等帥兵討之至治三年遣教化等往撫  
初附之民其歲參卜郎諸族叛鎮西武靖王搠思班發兵進討更  
遣徽政院醜驢往督師泰定帝卽位西蕃寇鞏昌府元年命四川  
平章囊加台兼宣政院使往征參卜郎復遣使往招諭而命陝西  
行省以兵討階州土蕃二年參卜郎來降賜其酋班木兒銀鈔幣  
帛以乞刺失思八班藏卜爲土蕃宣慰使都元帥兼管長河西奔  
卜兒亦思剛察沙加兒朵甘思脫思麻等管軍達魯花赤與其屬  
往參卜郎鎮撫之後至元三年西蕃賊殺鎮西王子党兀班事具  
世祖九王傳詔立行宣政院以也先帖木兒爲使往討之其後盜

滋多至正七年反者至二百餘所陷合刺火州劫供御蒲萄酒殺  
使臣明年有司請不拘資格委官討捕更命甘肅右丞崑進討訖  
不能靖自至順後帝師之命史蓋闕載順帝徵西僧伽刺麻至京  
師號灌頂國師錫玉印自是而主土蕃及分洩者率加師號矣  
論曰世祖嘗諭高麗王禎曰汝內附在後故班諸王下我太祖時  
亦都護先附卽今齒諸王上阿昔蘭後附故班其下嗚呼高麗與  
畏吾兒哈刺魯相去萬餘里矣而皆比於內地誠亦胡越一家也  
土蕃無大君長而以師號尊則又善因其俗而馴其人也然太崇  
則啟驕國敝而盜亦滋興雖郡縣之其能治乎故並錄於篇君子  
有以知籌邊之不易也



余義發

刊

楊尙友

門人曾紀瑞襄校

門人曾士琮詳校

元書卷八十七

元書卷八十八

邵陽曾廉撰

儒林列傳第六十三

昔司馬遷作儒林傳甚美公孫宏上言廣厲學校之路曰自此公卿大夫士吏斌斌多文學之士矣班固則言漢學業寢盛自武帝立五經博士開弟子員設科射策勸以官祿而然也蓋自秦驪山之禍經籍灰盡高帝嘗自伐馬上得天下其時將相大臣若蕭曹絳灌皆刀筆吏販縮吹簫之徒也至孝文漢興二十餘年始有賈生明經達政然不能久歷於其位謫長沙鬱鬱以終文帝固漢時有道之君也而不能崇儒如此故自孝武相公孫宏而侯之天下學士始靡然鄉風而其精選博士弟子納之仕途以寢登列位朱紱所繫胄子莘莘焉故曰公卿大夫士吏多文學之士此遷所為



歎息欣幸者也若夫元成哀之世則有匡衡張禹孔光馬宮膺台省之重兼師傅之尊論其經術則當時諸師所未逮考其行事則柔佞深猾乃類乎婦寺又何儒之卑也其所謂設科射策勸以官祿而然歟余嘗綜覽百代儒之爲術也根本於六經自漢立十四博士各以家法轉相教授其大儒碩師授受本末固蔚宗之史可攷而知也六朝以來學分南北李延壽言江左易則王輔嗣尙書則孔安國左傳則杜元凱河洛左傳則服子慎尙書周易則鄭康成詩則竝主乎毛公禮則同遵於鄭氏於是博士之業稍與漢異而經師舊家之荒墜多矣校其得失尊梅賾僞古文尙書而以爲安國其最陋乎至於唐平隋亂貞觀君臣號明儒業其作正義也一從南學中葉以後韓愈申孟子聞見知之說始言堯傳舜舜傳禹禹傳湯湯傳文武周公文武周公傳之孔子孔子傳之孟軻軻

之死不得其傳焉則愈以軻之傳隱然自任道統之說興矣愈之後宋程頤遂言孟軻死聖人之道不傳而推其兄顥興起斯文上繼軻軌則宗愈之說而祧愈升顥者也其後朱熹出盛推周敦頤太極圖說通書之奧敦頤又顥頤之師也於是宋史特立道學傳以敦頤爲首二程次焉程頤傳楊時時傳羅從彥從彥傳李侗侗傳朱熹而以爲熹集諸子之大成以格物致知爲先以明善誠身爲要凡詩書六藝之文孔孟之遺言顥錯於秦火支離於漢儒幽沈於魏晉六朝者至是皆大明而各得其所也自是而後道學遂標出於儒林之外天下獨以程朱之學爲道學若與漢唐老宿先生確乎判齊魯汶陽之界然朱熹固未嘗遺音讀訓詁制度名物而自謂幽深元遠高出於古人也夫格物致知云者博學之審問之慎思之明辯之篤行之五者是也非誦讀攷究思索辯論則何



以明天下之是非得失非閱歷踐履及之則所云知者猶疑似之  
閒也此儒術之所以徹天地貫古今盡己之性以盡人物之性無  
有乎弗具無有乎弗同者也是故孔子立儒之極者也六經之言  
皆所以使人格物以致知也而正己正物在是矣非道學烏足爲  
儒林哉論者徒見漢立博士束縛其弟子以從家法非是則不達  
殆亦與唐宋科舉試詩賦經義帖括聲病無異故遂以爲流俗而  
別異之此徒班固以爲趨利祿之路而不知史遷所以欣幸之情  
也蓋學校之設三代同之皆所以明人倫也大學之教人各分以  
治天下之責非其不應有利祿也且科舉者國家取士之制士之  
登進之費又非遂有害於道也然自古以來雜流之進用常多而  
儒者之進用常少賈誼董仲舒劉向楊震盧植鄭康成陸贄韓愈  
以及孫奭范仲淹周敦頤胡瑗張載程顥程頤司馬光范祖禹朱

熹呂祖謙張栻魏了翁真德秀或零落不得位或得位而不獲行  
其志者比比皆是也故宋金元之際固亦有南北之學也自趙復  
至燕而楊惟中姚樞許衡郝經劉因始知有程朱之書復以俘虜  
之餘闡明儒術竇默又得伊洛之書於孝感異地同符樞衡默興  
而行皆聖賢之行言皆王佐之言衡傳之不忽木康里人也於是  
聖人之道達乎西極其時又有楊恭懿蕭燾王恂元之儒學於斯  
爲盛世祖又尊儒重道上追漢唐宋代之誼辟然其視許衡之治  
國不如王文統也又况百官皆以國人列右位其次則色目又分  
漢人南人爲二至於南省無識字之官近侍不能記帝服之數則  
欲自公卿大夫士以至於吏皆斌斌文學豈不難哉是時宋室遺  
老金履祥守夷齊之節履祥弟子許謙竝能繼美前修與姚許用  
舍殊而其爲純儒一也故輒考論其人自趙復以下三十餘人以



爲儒林傳而以其類附焉自晉以來經師授受已不可盡知要能卓然自立者也其依附程朱徒爲名高則又何以異於昔博士之門哉然亦略做遷固之意分經依類爲次專經沈篤之士未可湮也若夫楊惟中姚樞許衡竇默郝經楊恭懿王恂不忽木自有傳不復列於此云

趙復字仁甫德安雲夢人也宋季抱道不仕太宗七年曲出太子屠德安時楊惟中行省軍前姚樞奉詔從惟中求儒道釋醫卜之士因脫復與之語大奇之復以九族俱殘不願生樞恐其自裁也留其宿帳中旣覺則失之樞遂馳馬周號積屍閔行及水際則見復被髮徒跣仰天而號幾自沈樞力寬譬勸存身庶延宗祀復乃從之先是南北道梗載籍不相通至是復以所記程朱諸經傳注盡錄付樞至燕學子從者百餘人世祖在潛邸召問曰吾欲伐宋

卿爲我導乎對曰宋吾父母邦也豈有導人伐父母者世祖悅因不强之仕惟中聞復議論嗜其學乃與樞建太極書院立周子祠二程張楊游朱六君子配焉購求遺書八千餘卷請復講授其中復以周程而後書廣博學者難貫通乃原義農堯舜所以繼天立極孔顏所以垂世立教及宋儒所以紹續者作傳道圖而條列書目於後別著伊洛發揮以標其宗旨朱子門人見諸傳記與得諸傳聞共五十有三人作師友圖以寓私淑之意又取伊尹顏淵言行作希賢錄使學者知所嚮慕於是求端用力之方備矣樞旣傳復學由是許衡郝經劉因皆得其書而尊信之北方知有程朱之學自復始也復雖居燕不忘故土因以江漢自號學者稱江漢先生其時爲楊惟中所致者平州王粹子正粹佐復長太極書院選俊秀有識度者爲道學生號良師焉



金履祥字吉父婺州蘭谿人也其先本氏劉後避吳越王嫌名更爲金氏履祥學博通而研其精初王柏學於何基基學於朱熹弟子黃幹履祥學於王柏從登何基之門柏教履祥居敬以持其志立志以定其本基則教以嚴理欲之分履祥皆服膺而力行之方是時宋已不可爲履祥遂絕意進取然襄陽事急履祥上牽制擣虛之策言若以重兵由海道直趨燕薊則襄陽之圍自解且備敘海船所經州郡縣邑以至重洋別島難易遠近瞭如也宋終莫能用德祐初起爲史館編校辭不就時又江浙多盜履祥屏居金華山中上下巖谷追逐雲月時自嘯咏世人莫之測也自朱熹以戴記大學中庸二篇合論語孟子爲四書爲之章句集註履祥皆爲之疏證事典益詳核焉治尙書沈思數十年又嘗言秘書丞劉恕通鑑外紀不本於經而信百家之說是非頗謬於聖人不足以傳

信乃作通鑑前編以授弟子許謙曰二帝三王之道其微言懿行宜後王所當法戰國申商之術其苛法亂政亦後王所當戒則是編不可以不著也性篤風誼嘗傾貲以贖故人子及其母罪終不自言何基之喪王柏約同門制服履祥爲之議曰爲師服者弔服加麻心喪三年古之制也布襦俗服也今之總麻功以上者用之生絹鈎領之衫俗服也今之總服亦用之服今總麻之服是不得同喪父無服之重也疑衰古士之弔服也其服亡矣白布深衣古庶人之弔服其制今猶存焉然古之士今之官也今之士其未仕者古之庶人也宜用古庶人之服而以深衣爲弔服昔朱子之服門人用細麻深衣而布緣矣然凡布皆麻古以三十升麻爲麻冕之布以十五升麻爲深衣之布深衣之麻自司馬氏朱氏皆云用極細布則深衣布用芻代麻久矣其緣則孤子緣以素是喪父旣



除之服也孔門喪夫子若喪父而無服則以喪父服除之服為若喪父無服之服其純用素可也其冠則庶人之弔素委貌失其制矣以白布代之而加素經於冠可也加麻之經總服之經也今用總麻而小可也加麻之帶總服之帶也今用細苧可也所謂疑衰擬於衰者也其詳審古今之制禮家莫及焉或曰此議王柏作也非也履祥平居故處終日儼然而接人和懌訓迪肫切不倦學者稱仁山先生至元大德之閒朱清張瑄漕海人始知履祥向所陳海道不爽咫尺云大德七年卒後至元中詔謚文安

許謙字益之婺州金華人也父宣宣弟觥咸純七年進士蚤卒無子宣命謙為觥後謙甫能言母陶氏口授以孝經論語入耳輒不忘長從金履祥游並及王柏之門盡得其奧嘗做史家年經月緯之法起太皞氏訖宋元祐元年秋七月尚書左僕射司馬光卒蓋

以為光卒則中國之治不可復興誠理亂之原也故名其書曰治忽幾微附於春秋續經書孔子卒之義其意致深淵如此謙於學無所不該貫並旁及釋老之言以為欲闢異端不可不深明其同異也然謙嘗曰學以聖人為的必得聖人之心而後可學聖人之事聖人之心備在四書四書之義備於章句集注此其歸宿也性篤孝友深居仙華山不出閭里者四十年四方之士雖距百舍皆翕然從之官司過必存問焉或訪以典禮政事謙觀其會通而為之折衷聞者皆厭服廉訪司薦於朝郡復舉遺逸並不起謙身負正學之重教人內外殫盡然獨不以科舉之文教人曰此義利所分也學者稱白雲先生後至元三年卒詔謚文懿說者以為先時何基王柏金履祥傳朱熹之學猶未甚顯至謙乃大光云然謙言詩二南相配從王柏譜詩時世從朱熹而亦采用陸德明孔穎達



之言詩漢有四家至唐惟毛獨行宋鄭樵頗攻毛詩序而朱熹因之其時呂祖謙卽不謂然而馬端臨益暢其說深以爲熹病端臨在文苑傳端臨尊信朱氏非培擊者也謙於詩及四書竝多援古義足補朱書之闕論者謂其窮探聖微於殘文羨語不敢忽有不可通則不敢強於先儒說有未安亦復不爲雷同爲得其實矣謙後善詩者梁益字友益江陰人舉鄉貢進士教授鄉里教人以變化氣質爲先學者多自千里而至浙以西惟益稱學術純正爲世師表論者言其發揮朱學爲精又有吉安劉瑾字公瑾劉玉汝字成之樂平朱公遷字克升及朱倬亦皆治詩傳朱學瑾隱居不仕玉汝鄉貢進士公遷以遺逸徵爲翰林直學士以言事不合出爲婺州教授徙處州倬在忠義傳謙弟子著者敬儼李國鳳自有傳朱震亨字彥修范祖幹字景先葉儀字景翰皆同郡人震亨以清

修卓苦聞於時世徒傳其醫術而已祖幹事親至孝其學主誠意而嚴於慎獨儀教人由聖賢之言求其心涵泳從容久自得之明兵入婺州祖幹儀皆不肯仕隱居以終儀弟子何壽朋字德齡祖幹弟子汪與立字師道亦皆窮經守志入明不仕卒又海鹽董正字仲貞嘗學於謙謙卒正築室仙華山三年而後歸入明年乃卒劉基題其墓曰董處侯

劉因字夢吉保定容城人也父述刻意問學好長嘯中統初宣撫司辟爲武邑令不就因生之夕述夢人以馬載兒至其家覺而生名之曰駟字壽驥後爲改焉因三歲識書日記千百言六歲能詩七歲能屬文甫弱冠才器超邁思得古人友之作希聖解初爲經學訓詁疏釋之說輒歎曰聖人精義殆不止是及得周程張邵朱呂之書曰我固謂當有此也用不忽木薦詔徵爲右贊善大夫以



疾辭明孝太子固欲致之乃就職專領東宮敎事未幾以母疾辭歸二十八年詔徵爲集賢學士因謝使者先還朝復命而上書宰相曰因聞君臣之義無所逃於天地之間者也今聖天子選用賢良雖前日隱晦之人亦將出而仕矣况因本非隱晦而加以不次之寵處以優崇之地其尙敢偃蹇不出負國家哉惟自去年喪子憂患之餘繼以久瘧蒸發舊積下血而旁無期功之親家無紀綱之僕竊恐一旦身先朝露必至累人已於先人墓側營居舍以待盡恩命忽至惶怖無地是以拜留使者稍候疾愈與之俱覲而遷延至今服療百至略無一效又不敢不請使者先還仍令學生李道恆納上鋪馬聖旨病退當自備氣力以行因實疏遠微賤之臣與幃幄諸公不同其進與退似非難處之事惟閣下始終成就之帝聞其言歎曰古有不召之臣其斯人之徒歟三十年卒無子聞

者嗟悼延祐中贈翰林學士資善大夫護軍容城郡公諡文靖因蚤孤事繼母孝家貧父祖之喪賴先友楊恕之助始克葬而性不苟合非義不取家居敎授師道尊嚴嘗愛諸葛孔明靜以修身之語表所居曰靜修公卿至其廬因多避不見惟許衡之應召也過之因謂曰公一聘而起毋乃大速衡曰不如此則道不行及因辭召或問之曰不如此則道不尊君子兩是之初因與滕安上同師事硯彌堅彌堅字伯固德安人亦楊惟中致之而北尋試西京中選遂移家真定授徒自給以薦卽擢真定敎授至元中召爲國子司業屢以陽城忠孝之說訓迪諸生歲餘移疾歸爲人清苦嚴重士林推美之安上字仲禮中山人以薦除本郡敎授累拜監察御史以地震上疏反覆深切以疾去位尋召爲國子司業卒贈昭文館大學士諡文穆因弟子烏冲字叔備其先大甯人從父官汴以



公卿子弟趨因席凜若寒士爲學清苦聞師言書誦夜思若忘寢食居喪行古禮其家日貧日晏食或不充泊如也高蹈深隱卒贈祕書郎因弟子高行莫如烏冲是時又有燕人順德董朴字太初豪城安熙字敬仲俱以儒學名朴不事著述而研究古聖賢之旨而會通之其心所自得醞然也用薦起爲陝西知法官旋辭召爲太史院亦不就後以翰林修撰致仕其事親孝與人交無愚智賢否一待以誠或有犯不校也學者稱龍岡先生弟子王結自有傳熙祖滔父松皆以學行淑其鄉人熙傳家學而向慕因欲造其門而因已沒乃從烏冲問故先是朱熹四書注義傳至北方金王若虛爲說非之陳天祥喜若虛說爲增益其言熙爲書與之辯天祥悔焉熙生平簡靜和易務爲下學之功亦不肯仕進家居教授數十年卒鄉人爲之祠弟子蘇天爵傳其學自有傳至正中言四書

者温州史伯璿臨川詹道傳餘姚景星伯璿字文璣辯別朱熹四書章句集注與或問語類文集之同異歸於一是論者以爲因於四書朱義刊繇舉要伯璿則益加釐正朱書爲大明云安上亦有弟子東平蔡文淵歷官國史院編修翰林學士參知政事

蕭剡字維斗奉元人也金季爲京兆府吏尹筆墜命拾之剡曰吏與尹謀王事非拾筆者也卽引去鑿土室終南山下蟄伏三十年製革衣由身半以下及臥輒倚其榻玩誦經傳不少置其篤志如此世祖藩秦辟之剡辭疾以爲陝西儒學提舉亦不至長官乃具宴其家以禮之一從史先焉適剡方汲水灌園從史以爲傭也使飲其馬剡卽飲之已而冠帶迎賓飲馬者也從史懼剡不以爲意後累授集賢學士國子司業改集賢侍講學士竝不就成宗詔以太子右諭德徵剡入覲以朝廷方尙酒書酒誥以獻而力乞歸田



尋除集賢學士國子祭酒仍兼諭德疾作固辭歸卒諡貞敏剡性至孝制行甚高通六經百氏尤善三禮竝深六書學者及其門甚眾皆教之自小學始文辭亦精深言近旨遠時稱一代純儒同郡知名者韓擇侯均同恕擇字從善信道不惑其教人必先小學與剡同而學者雖中歲以後亦罔不由之或有議其過時勤苦則曰人不知學白首童心也且白首得爲童蒙之學不猶蚤乎擇亦善禮有質問者口講手畫無倦容始與剡及楊恭懿同辟後世祖召赴都以疾不行其卒也門人服總者百餘人焉均字伯元蚤孤獨事繼母賣薪以養積學四十年淹貫百籍雖方言古語世莫能曉問無不卽答世皆服其博聞然嘗言讀書不干徧終於已無益非徒恃天姿挺異者也用薦起爲太常博士後以上書忤時相不待報歸均貌魁梧而氣剛正人多嚴憚之而應接之際雍雍如也學

者宗之然少許可嘗曰元有天下百年惟蕭維斗爲識字人恕字寬甫父繼先博學能文家世儒素同居二百口無閒言廉希憲宣撫陝西辟掌庫鑰恕明尙書至元閒辟名士爲部吏屬陝西以恕貢禮曹辭不行仁宗踐阼卽其家拜國子司業使三召不赴陝西侍御史趙世延請置魯齋書院於奉元以恕爲長先後來學者殆千人延祐六年召爲左贊善入見東宮歷陳古誼盡開悟涵養之道明年移疾歸致和元年拜集賢學士稱老疾辭恕事繼母極孝父喪哀毀致目疾時祭齋宿詳至其爲學務貫浹事理以利於行教人曲爲開導使端趨向家無儋石之儲而聚書數萬卷扁所居曰槩菴蕭剡入城府必主恕士論稱之曰蕭同至順二年卒贈翰林直學士京兆郡侯諡文貞剡又有弟子第五居仁字士安亦同郡人後師恕博通經史學徒滿門躬率子弟力農嘗遇竊其桑者



居仁輒避之鄉人皆高其行誼卒門人私謚靜安先生

吳澄字幼清撫州安仁人也三歲能誦古詩五歲日受千餘言夜讀至旦母憂其過勤節膏火不多與澄候母寢然火復誦習長志聖賢之學宋季舉進士不第隱居布水谷閉戶著書至元中侍御史程鉅夫奉詔求賢江南題其居曰草廬而表致澄至京師尋辭歸鉅夫請置澄書於國子監以資學者詔從其請元貞初游龍興江西省掾元明善夙負文學從澄問諸經奧義歎爲淵海遂執弟子禮終身而左丞董士選奇重之延於家親執饋食曰先生天下士也旋舉澄有道擢應奉翰林文字不到官除江西儒學提舉居三月亦以疾免至大元年召爲國子監丞皇慶初遷司業澄一夕謝去諸生有不謁告而從之南者俄拜集賢直學士疾不果上英宗卽位超遷翰林學士有旨集善書者泥金寫佛經詔澄爲之序

澄曰主上寫經爲民祈福甚盛典也若用以追薦則非所知也蓋輪迴之事彼習其學者猶或不言不過謂善人死則與日月齊光惡人死則與沙蟲同類其徒遂爲薦拔之說務以惑人今列聖之神上同日月何庸薦拔且國初以來寫經追薦數矣若未效是無佛法若已效是誣其祖文辭不可以示後世也泰定元年首命澄與張珪鄧文原爲講官先是太廟作十三室未及遷奉而國有大故有司疑於昭穆之次命集議澄議復古七廟廟各有宮之制然同堂異室行之已久遂不從其言時澄已有去志會命修英宗實錄居數月成未及上卽移疾詔賜宴國史院仍勉留之宴罷澄卽出城去中書遣官驛追不及詔增秩厚賜之天祿四年卒贈臨川郡公謚文正澄身若不勝衣平居正坐拱手氣融神邁答問亶亶學者稱草廬先生其在國子監也初祭酒許衡以小學教弟子甚



肅久之漸弛澄昧爽然燭堂上諸生以次受業日昃退燕居之室諸生仍執經問難澄反覆訓誘之每至夜分雖寒暑弗易也既乃用程顥胡瑗朱熹成法爲四教一曰經學二曰行實三曰文藝四曰治事未及行澄嘗言朱子主道問學陸子靜言尊德性學問不本於德性則其弊必偏於言語訓釋之末論者遂謂澄爲陸氏之學非許氏尊信朱子本意故澄卽去職行澄學甚博於諸經皆有纂言自謂尤有功於易而旁及老莊太元皇極經世書八陣圖葬書其釋經發論多有依據而盡破傳注之穿鑿自唐孔穎達作正義用梅賾古文尙書朱熹弟子蔡沈爲之集傳然熹頗於古文致疑焉澄獨取今文二十八篇不錄古文自六朝以來確然不惑於梅賾而去之果者澄一人而已然實亦本朱熹說也是時明尙書者休甯陳櫟鄱陽董鼎櫟字壽翁揭傒斯志其墓以與吳澄並稱

櫟七歲通進士業宋亡科舉廢慨然發憤從事於經傳隱居授徒號定宇先生延祐初設科櫟年已六十有三矣與江浙鄉試舉進士以病不赴禮部復教授於家元統二年卒其言尙書始謂蔡氏稍異師說其後乃自改舊說悉從集傳櫟惟務守功令始終爲科舉之學者也鼎字季亨傳其族兄夢程之學自負得朱熹之再傳以爲集傳旣朱子所訂定則與自著無異亦頗取陳櫟之說南康陳師凱字道勇又因鼎說而補其略師凱隱居廬山以終其後吉安王充耘字野耕王天與字立大邵武黃鎮成字元鎮皆以善尙書名充耘元統二年進士授同知永新州事棄官歸授徒養母其說稱堯典乃舜典之緣起本一篇也故曰虞書頗合二十八篇之目然未能悉別也鎮成嘗取虞書秣象日辰律度量衡五禮五樂禹貢山川洪範九疇著爲圖說以爲紫陽遺教也厭棄榮利游山



浮海而返築室城南號南田耕舍執政因薦授以江南儒學提舉未上卒賜諡貞文處士天與仕臨江教授澄子文同知柳州總管府事京翰林國史院典籍文子當

當字伯尚通經史百家言自澄卒四方學子從澄游者多就當卒業焉至正五年以父蔭授萬億四庫照磨用薦改國子助教勤講解嚴肄習諸生皆樂受其範以與修遼金宋三史成除翰林修撰兩遷司業歷翰林直學士時江南兵起且五年翰林舉當才任政事授江西肅政廉訪使命偕江西參知政事火你赤兵部尙書黃昭便宜招捕當以朝廷兵力不給乃召募民兵由浙閩入建昌招安新城道路既通乃進攻南豐破之十六年帥師與黃昭平建撫兩郡是時參知政事朵歹總兵積年無功忌當屢捷乃以爲南人不宜典兵又構爲蜚語謂二人皆通寇詔二人竝解兵除當撫州

總管昭臨江總管竝供億火你赤軍火你赤殺當從事范純章迪迪攻撫州立功者也將士皆憤當善言慰解之而火你赤又上言二人不可牧民於是與昭俱除名十八年火你赤自瑞州還龍興當昭皆隨軍不敢去也先是朵歹火你赤劾狀先至而當昭上功自廣東浮海未達故朝廷罪之既得當昭奏乃知其誣詔拜當中奉大夫江西參知政事昭湖廣參知政事命未下而陳友諒已陷江西火你赤棄城遁當乃著道士服杜門著書友諒辟之當臥牀不食以死自誓乃舁牀載之舟送江州拘留一年終不爲屈後明主既破友諒復迫致之當亦長揖不拜竟得放還隱吉水谷平逾年卒澄又有弟子鮑恂藍光黎仲基恂字仲季崇德人從澄受易後至元成進士至正中薦授溫州路學正召入翰林不就明初以五經徵授文華殿大學士固辭歸學者稱西溪先生光字仲晦初



元書 卷八十八  
爲南安路主事江西陷入閩轉行省照磨尋檢校都事與陳友定議不合拂衣去閩復陷光深衣幅巾隱居教授越三十三年乃卒仲基名載臨川人郡以明經博學薦授太平教授嘗以奇策佐左丞章伯顏取勝江上歸築室瓜園明初再薦不起以壽終

耶律有尙字伯強遼東丹王十世孫自其祖父家於東平遂爲東平人也有尙受業許衡之門至元八年衡爲國子祭酒奏以其弟子十二人爲齋長有尙徵焉衡告歸有尙爲助教居久之拜監察御史不就除秘書丞出知薊州政尙寬簡明孝太子重其人召爲詹事院長史自有尙去學國子業頗廢廷議當再用振興學校乃除有尙司業是時未建學館弟子寓居民舍有尙屢以爲言自是黌宮廣矣竝增弟子員而遷有尙爲祭酒數歲乞養歸大德初復召任舊職累遷集賢學士以葬父復乞歸復以安車召累辭不允

起爲昭文館大學士仍兼祭酒有尙前後五居國學其爲教主明義理尙恭敬省察必真切踐履必端慤凡文辭小技綴緝雕刻足以破裂聖人之道者皆屏黜之是以諸生知趨正學尊經術而務躬行尋固請歸東平卒詔諡文忠十二人者姚燉孫安河內人燉僉江西按察使事韓思永蘇郁大名人王遵禮字安卿初名梓汴人遷燕劉季偉劉安中秦人季偉號存齋終四川按察副使白棟字彥隆太原人終按察副使高凝字道凝河內人終翰林侍講學士姚燧在文苑傳呂端善在李德輝傳

吳師道字正傳婺州蘭谿人也自羈州知學卽善記覽工詞章才思涌溢發爲詩歌清麗俊逸弱冠讀真德秀遺書幡然知學以爲己也乃事金履祥由是湛深義理而務關異端至治元年成進士授高郵縣丞調甯國路錄事遷知池州建德縣用薦召爲國子助



教遷博士師道居官明達文法吏不敢欺在甯國以歲大祲上請於使下勸富民凡出粟活饑民三十餘萬人在建德豪民竝郡學田七百畝師道按圖籍悉以歸於學其教國子也一本朱熹之旨而遵許衡之成法未幾致仕歸授奉議大夫禮部郎中卒維時國學師儒有名者自許衡後長官吳澄澄孫當耶律有尙齊履謙字尤魯狝屬官程端禮劉賡謝端陳旅周仁榮宇文公諒履謙狝自有傳賡在祖肅傳端在宋本傳旅在文苑傳

周仁榮字本心台州臨海人也父敬孫字子高宋太學生與婺州金履祥同郡楊珏君寶陳天瑞德修車若水清臣黃超然立道皆事王柏天瑞咸純進士珏咸純中爲督府機宜官超然兩舉鄉貢宋末皆隱遯林壑超然築西清道院以居至治初始卒諡康敏仁榮承其家學又師珏天瑞治易禮春秋而工爲文章用薦長美化

書院院在處州萬山中人鮮知學仁榮舉行鄉飲酒禮士俗爲變江浙行省辟爲掾省官皆呼爲先生不敢待以吏泰定初召爲國子博士遷翰林修撰翰林待制詔代祀嶽瀆至會稽疾作卒其弟子多有成泰不華最有名自有傳仁榮築一室初落成友人楊公道輿疾至門曰願假新宅以死仁榮讓正寢居之俄而楊死遺篋廿八楊弟詣仁榮求分財仁榮曰若兄與我死意固有在也卽以已財斂殯對眾封篋自平陽呼其子至悉命輿歸人皆以此義之宇文公諒字子貞潮州人通經史百家言弱冠館於州富人夜拒奔婦曉託故辭去至順四年成進士同知餘姚禱雨有應民頌曰別駕兩省檄察松江海塗田公諒以潮汐不常乞一概免科民以無累召爲國子助教日與弟子辯析諸經六館之士資其甄陶者往往出有實用調應奉翰林文字同知制誥兼國史院編修官既



告復召爲國子監丞除江浙儒學提舉改僉嶺南廉訪司事以疾請老平居雖暗室必正衣冠端坐夜嘗書終日行事於冊其不可書者卽不敢爲也卒門人私謚曰純節先生仁榮同郡孟夢恂字長文亦師事楊珏陳天瑞說經精切務見諸施行四方從游者甚眾署本郡學錄至正十三年以設策禦鄉郡寇論功授登仕郎宜興州判官未受命卒詔謚曰康靖先生

尙野字文蔚保定滿城人也以處士徵爲國史院編修兼興文署丞出爲汝州判官遷南陽縣尹有政聲改懷孟河渠副使建言河渠宜隸有司不宜置官從之大德中遷國子助教諸生入宿衛者歲從幸上都丞相合剌合孫始命野分學於上都以教諸生上都分學自野始俄遷博士誨人先經學而後文藝嘗曰學有未得徒事華藻猶持錢而買水也能自鑿井及泉不可勝汲矣時學舍未

備野密請御史臺出帑藏所積大建學舍以廣教育仁宗在東宮野爲太子文學時與賓客姚燧諭德蕭剡入見禮有加焉至大初除國子司業近臣奏分國學西序爲大都路學帝已允野謂國學府學混居不合禮制事遂寢居三歲拜翰林直學士知制誥同修國史仁宗旣踐阼遷翰林侍講學士改集賢侍講學士兼國子祭酒延祐二年移疾歸四方來學者益眾六年卒年七十六贈通奉大夫太常禮儀院使護軍上黨郡公謚曰文懿野性高敏志趣正大文辭典雅事繼母以孝聞子師易位蘄州路判官師簡奎章閣侍書學士同知經筵事

胡一桂字庭芳徽州婺源人也宋景定五年鄉貢進士不第遂退居以周易教授遠近師之號雙湖先生周易自王弼注行宋程頤作易傳有取焉而去弼之元虛若漢孟喜言卦氣京房言飛伏鄭



康成言爻辰虞翻言納甲宋人皆芟棄之然邵雍所傳河圖洛書  
先天後天諸圖說猶之漢人術數也自朱熹作周易本義及啟蒙  
兼取程邵邵學遂盛熹之易傳黃幹幹傳董夢程夢程傳沈寶貴  
而一桂之父方平從寶貴夢程游一桂傳其家學兼明詩習諸史  
同郡胡炳文字仲虎亦通易及四書官蘭溪州學正號雲峯先生  
二胡皆斷斷於木不歸根狐不首邱之戒墨守朱書而已一桂弟  
子董真卿字季真董鼎子真卿學於其父復師一桂及熊禾其爲  
說兼通程朱務持義理象數二家之平亦博采先儒舊論不專執  
師法是時洛陽保八字公孟潼川趙采字德亮卬州王申子字異  
卿南昌熊良輔字任重清江張理字仲純吉安龍仁夫字觀復蕭  
漢中字景元解尚字觀我尙弟蒙字求我曾貫字傳道湖州錢義  
方字子宜天台陳應潤字澤雲吳俞炎字玉吾及胡震李簡皆以

易名貫在忠義傳保八仕黃州路總管良輔鄉貢進士仁夫授浙  
江儒學副提舉不就論者謂其說易多前人所未發世稱麟洲先  
生申子充南陽書院山長後寓居慈利天門山三十年卒申子及  
理尤繳繞圖書之學應潤獨謂義理元妙之談墮於老莊先天諸  
圖雜以參同契爐火之說謂帝出於震爲八卦之方位文王演易  
必不顛倒伏羲之文炎言世之言圖書者類以爲馬毛之旋龜文  
之拆而書顧命天球河圖竝列則河圖亦玉而有文者爾崑崙產  
玉河源出崑崙故河亦有玉洛水至今有白石洛書蓋石而白有  
文者其說皆與諸儒不同然於經爲近之炎在宋寶祐間以詞賦  
名入元隱居著書尤善易號林屋山人徵授瀘州學錄不赴延祐  
中卒學者亦稱爲石澗先生胡震終徽州教授自至元來太保劉  
秉忠左丞許衡皆稱善易秉忠頗雜術數衡發明同功異位柔危



剛勝之旨爲儒者之易吳澄博綜舊聞發明象例言易者宗焉然名者推黃澤

黃澤字楚望資州內江人也父儀可隨兄驥子官九江因家焉蜀學治經先注疏澤以明經學道爲志好爲苦思雖成疾疾止復思久之如有所見作顏淵仰高鑽堅論時人歎其沈摯用薦長景星書院移東湖秩滿當遷澤卽歸授徒養親不復求仕嘗慨聖遠經殘傳注家多傳會近儒立意又各用其才識故議論多而經愈晦必積誠生悟然後聖人之本旨可見也故始條六經中疑義羸千以示學者旣乃盡悟失傳之旨自言每於幽閒寂寞疾病倦苦之際得之以爲易主明象當因孔子十翼以上窺文王周公春秋主明書法而攷覈三傳脈絡盡在左氏乃作文共十餘通以見虛辭說經之無益其於禮謂鄭氏深而未完王肅明而實淺肅混郊邱

廢五天帝併崑崙神州爲一與趙伯循言王者禘其始祖之所自出以始祖配而不及羣廟之主胡宏家學不信周禮以社爲祭地之類皆不符經義吳澄盛稱澤以爲近時經生莫能及也然澤雖自慎重學士李涇過九江請北面受一經澤曰君之才何經之不明然學非艱苦不可吾非邵子不敢以二十年林下期君也涇歎異而去澤嘗以爲經之興廢上關天運後老不復能教授歲大祲貧甚家人采木根草實以食晏然曾不以動其意惟以聖人之心不明而經將失傳爲己大戚至正六年卒澤以覃思名其學以明易象爲獨得懼學者得於創聞不復致思故其爲說多引而不發嘗言易象與春秋書法廢失大略相似苟通其一則可觸機而悟也然澤自言自漢諸儒至虞翻欲明象遂流於煩瑣或涉支離誕漫而以上經開闢以來經制之象下經是人道之首正家以及天



下之象固與程頤明理無大異云非恢詭者也李洞在文苑傳弟子趙汭能傳澤易春秋之學

俞皋字心遠徽州人也初其鄉人趙良鈞宋季第進士授修職郎廣德軍教授宋亡不仕以春秋授徒皋受其學春秋在唐以前謹守三傳自啖助趙匡倡爲信經不信傳之說宋孫復劉敞承其風程頤傳未成朱熹不爲注而胡安國傳獨顯皋言春秋遂以四傳竝列然皋意以程氏爲宗良鈞同時平江陳深字子微亦講春秋宋亡不仕天秣閒被薦潛匿不出卒而當時有史蒙卿者與黃震齊名蒙卿字景正鄞人宋咸純元年進士官平江教授宋亡隱居授徒自號靜清處士通春秋周官同郡程端禮字敬叔弟端學字時叔端禮十五能記誦六經曉析大義慶元自宋季皆尊尙陸九淵氏端禮兄弟從史蒙卿學獨傳朱熹明體達用之旨端禮著讀

書日程自國子監頒示郡校官爲學者式仕終衢州教授端學至治元年進士授仙居縣丞改國子助教動有師法學者嚴憚之遷太學博士命未下而卒端禮以春秋名於時然極攻駁三傳且曰左傳僞撰書也聞者駭焉當是時善春秋稱廬陵李廉欽鄭玉休甯趙汭廉玉皆在忠節傳汭字子常事黃澤澤之說以左氏傳爲主注則宗杜預左有所不及者以公羊穀梁通之杜所不及者以陳傳良之說通之汭又以爲杜偏於左傳傳良偏於穀梁當用長補短務得其平又據孟子事則桓文文則史義則邱竊取之意謂主史以釋經是不知筆削之有義據經以生義是不知其文之則史因論策書之例十有五筆削之義八然後經傳分析融會汭築東山精舍授徒養母隱居不出其學通六經百氏而以春秋爲深學者稱東山先生汭與同郡汪克寬倪士毅朝夕講學稱新安三



君子克寬字德輔泰定三年鄉貢進士亦通春秋竝善諸經學者稱環谷先生然克寬守胡氏與沆不相雷同明洪武初與沆同徵修史俱不受官歸卒於家士毅字仲宏事親至孝隱居祁門山以終

敖繼公字君長福州長樂人也寓於湖州宋季仕定成尉以父任當補京官讓於弟彝復舉進士對策忤時相遂不仕築小樓於湖冬不爐夏不扇日事經史州人趙孟頫倪淵師事焉繼公學通贍尤深於禮當是時儀禮爲絕學漢唐注疏儀禮已罕傳者朱熹好禮通注疏之學而爲古禮經傳通解以儀禮爲經而以記文爲傳各附經下然習之者黃幹楊復數人而已繼公則以爲鄭注不合經者宜刪而補以先儒之說亦或申其所獨見又以爲通解分記屬經而諸篇之記有特爲一條而發者有兼爲兩條或數條而發

者亦有於經義之外別見他禮者是不可併而爲一也又疑喪服傳違背經義非子夏作喪服傳自鄭康成已嘗疑其有誤而繼公暢其說大率深造自得不爲苟同者也大德中用薦授信州教授未上卒孟頫自有傳倪淵字仲深得繼公之傳平居動必以禮終湖州教授淵亦善易

邱葵字吉甫興化莆田人也宋亡避居海嶼自號釣磯翁其言周禮以爲冬官實未嘗缺雜出於五官之屬漢儒以攷工記補之非也葵蓋本宋人俞廷椿王與之之書而參訂之見者怪其過信臆說然葵屏絕人事刻志爲學竝通諸經當時皆重其人言周禮者時有南昌熊朋來毛襄龍吳陳深朋來字與可宋咸純十年進士授僉書寶慶府判官廳公事未上而宋亡始隱居授徒來學者嘗數百十人用薦爲建甯教授移吉安調建安主簿不就以福清州



判官致仕延祐元年始行科舉行省就朋來問舊典亦聘之主文  
初朋來以周禮首薦鄉郡是時新制周禮未設科治戴記者亦鮮  
朋來屢以爲言不能得也朋來學淹通而以三禮爲長其爲教授  
所至皆攷古篆籀文字調律呂協歌詩以興雅樂制器定辭必則  
古式每燕居鼓瑟而歌因作瑟賦二篇學者傳誦焉號天慵先生  
至治中英宗始親祀太廟銳意於制禮作樂之事翰林學士元明  
善揚言於朝以朋來爲明禮樂未及召而卒襄龍字介石大德閒  
官澧州教授能總諸儒訓釋而斷以己意陳深已見俞卓傳其時  
又有臨川葉宋英自製譜曲均閒合節趙孟頫虞集亟稱之欲引  
入禁林論樂律而宋英已卒乃取所著曲譜及樂律遺書上之宋  
英嘗云黃鍾九寸之管無定論隨所置律而上下損益以爲聲均  
存而律可辯也其妙悟如此

陳澔字可大饒州都昌人也父大猷字文獻宋開慶進士授黃州  
判官學於黃幹弟子饒魯澔傳家學性澹逸博學好古隱居教授  
數十年不求仕進最深禮記頗譏鄭注祖讖緯孔疏惟鄭之從然  
亦以爲灼然可據者不可易也學者從之日眾號雲莊先生時紹  
興韓性字明善九歲卽通禮記作大義操筆立就長則博綜羣籍  
尤潛心性理之說性薄紛華家居授徒學子恆滿其門延祐設科  
有以文法請者性曰今之科舉悉本朱熹私議爲科舉之文不知  
朱熹之學可乎夫有德者必有言豈他求哉憲府舉爲教官謝曰  
幸有先人之敝廬足蔽風雨而薄田可具饘粥讀書砥行無愧古  
人足矣祿仕非所願也受而不赴然官司或就訪政事則從容陳  
說不苟默也弟子李齊爲南臺御史奏陳其仁義而性已卒其後  
南臺中丞月魯不花上言性法當得諡賜諡莊節先生月魯不花



亦弟子也自有傳李齊在忠節傳

熊禾字去非建甯嘉禾人也宋咸純十年進士授汀州司戶參軍宋亡不仕築雲谷書院以教生徒謝枋得聞其名而造訪焉是時學宮祀典以顏曾思孟竝祀堂上而伯魚顏路曾皙竝在兩廡西嚮侑食又言禮有祭鄉先生於社之文宜詔郡國各采其先賢列之羣祀又言兩廡從祀禮宜損益開元祀典七十二賢下有諸賢二十二人後世因之不改而如荀况以性爲惡以禮爲僞楊雄劇秦美新馬融爲梁冀作奏誣陷忠良杜預建短喪之議王弼尚老莊之說皆顯背經訓文不稱行董仲舒學行最純顧不得從祀亦典禮之闕者也禾蓋本洪邁之說而推言之然時際蹇剝私議而已不能昌言於朝聞者或是非之晚年更名鉢字位辛以自晦復立鰲峰書院於里四方學者從之甚眾號勿菴先生元有天下以

後閩學以禾爲宗其時有陳普者甯德人字尙德後以字行尊聞紹言三辟教授不起隱居石堂山學者稱爲石堂先生禾聘長鰲峰名與禾相亞云皇慶元年卒卒十有七年文宗詔以董仲舒從祀孔廟

張璠字達聖永康導江人也僑居越中嘗受業於王柏其學號宏深微密至元中南臺中丞吳曼慶聞其名延致江甯學宮中州士大夫皆遣子弟從游或開私塾迎之璠所授受眞州爲多學者稱爲導江先生以薦爲孔顏孟三氏教授璠以禮書殘缺釋奠釋菜名義徒存禮文無可攷者又以爲闕里象設帶劍均非古禮神宜東嚮配宜西嚮爲尸主人之位開元遷聖位南面後乃進顏孟參列如浮屠老子宮尤爲無稽乃爲制籩豆更定禮儀請正顏孟配位南向之失升曾子子思配饗以周程張邵司馬朱張呂氏從祀



秩滿鄆城士大夫具書幣迎致於郡居四載薦授東平教授不赴  
歸儀真卒至正中真州守臣以嚮及郝經吳澄皆嘗留真作三賢  
祠祀焉嚮氣宇端重音吐洪亮講說特精詳援据穿貫甚富弟子  
知名者夾谷之奇楊剛中孔思晦之奇附李謙傳剛中在文苑傳  
孔思晦字明道孔子五十四世孫也性簡默學於張嚮講求義理  
於辭章弗屑也家貧躬耕爲養大德中游京師耶律有尙欲薦之  
以母老辭歸母臥疾躬進藥餌衣不解帶居喪勺水不入口者五  
日至大中舉茂才爲范陽教諭延祐初調甯陽先是兩縣校官率  
以廩薄不能守職而思晦以儉約自持教養有法學者愛之當是  
時孔思誠以支庶襲衍聖公不厭眾望族人共推思晦宜主祀事  
狀上政府仁宗雅尙儒道一日問孔子裔今幾世襲爵爲誰廷臣  
對以未能定帝親按其譜牒知爲嫡長遂命襲封衍聖公月俸五

百緡賜四品印泰定三年山東廉訪副使王鵬南言爵襲上公而  
階止四品於格弗稱且失尊崇意至順二年改賜三品印思晦以  
廟燬於兵竭力營度以復其舊金絲堂壞又一新之祭器禮服悉  
加整飭又以尼山乃毓聖之地故有廟已燬民冒耕祭田且百年  
思晦請置尼山書院以列於學官從之三氏學舊有田三千畝子  
思書院有營運錢萬緡取子錢以供祭祀歲久多失思晦皆理復  
之聖父舊封齊國公思晦言於朝請加褒崇乃詔加封聖父啟聖  
王五季時孔末之後方盛欲以僞滅真害宣聖子孫幾盡至是其  
裔復欲冒聖人後思晦以爲不早辯則真僞久益不明遂會族人  
稽世系斥之而重刊宗譜於石元統元年卒有鶴百餘翔其屋上  
又有神光自東南落其舍北至正中謚曰文肅子克堅襲其時永  
豐曾巽申字巽初父晞顏官湖南儒學提舉兄德裕大德中爲翰



元書 卷八十八  
林學士異申孝友篤學尤嫻於禮嘗上郊祀禮樂及鹵簿圖書仁宗授以翰林應奉知制誥兼國史編修官英宗命造五輅弗及就而變作異申遂歸天順元年卒

論曰後之儒生能通經者鮮矣何也彼所習者經而所用者非經也故後人荒經之罪不減於焚書也以其不用遂相棄而去之以爲非所以謀食者故李斯亦趨時而已矣士不趨時而後可以爲儒矣故曰謀道不謀食上用儒術則見上不用儒術則潛何徘徊之有哉不此之爲而病儒術之疏不知其用之非非所習之非也

曾傳幹 刊

門人曾傳澄襄校

門人曾士琮詳校

元書卷八十八

元書卷八十九

邵陽曾廉撰

文苑列傳第六十四

文苑傳始自范書或曰周易乾坤有文言爲聲律駢偶之言也非是則不得謂之文也竊謂若是則尚書不如葩經而梅賾贗古文爲勝於四代之真鼎也蓋嘗攷許慎氏言倉頡之初作書依類象形謂之文其後形聲相益謂之字然各爲部居不相雜廁自善屬文者出然後以文發其意以意成其文經緯之用宣焉然後文與文比次而成章故曰物相雜曰文然其始則聖賢爲之堯典皋陶謨禹貢甘誓湯誓盤庚高宗西伯微子諸篇上之敘天文地理行師遷都諸大政而下陳興亡之故歷歷焉如指諸掌也何其森而摯也斯非所謂昭昭揭日月者乎延至宗周周公制之於前尹吉



甫諸人作之於後皆琅然韶濩之音也而其時里巷歌謠亦有興者雖極參差亦藹然一出於性情之正故其文炳焉平王東遷詩亡而春秋作其時左國號爲能存周禮未幾而戰國策出焉然其言則駁而其文未嘗不足以聳後人之聽也時則孟子負泰山之氣莊周極瓌璋之觀屈原纏絛悱惻足感鬼神風雅之遺則也自是而李斯柄國人頭畜鳴車裂宜矣乃其文雄險奧峭謂之先秦至漢則孝文崛起有朝曦之氣而賈生適丁其時與爲輝映孝武繼起武則力搏熊虎而閔邊塞衛霍以興文則爾雅深厚而表章六經董生二司馬公孫鄒枚以起何則文章之盛非帝學不爲功後之人讀子虛無能終篇况心好之而不啻口出者乎由是以後劉向父子殊途各極雄婉揚雄頗以艱深文其固陋又好襲舊體然非無面目也又逮東漢班固張衡代興而平子蒼勁過之下訖

蔡邕雖極博辯而體亦率矣斯又秦漢以來作者之林也魏晉以還陳思偉壯而開儷體之風二陸開朗而乏疏古之趣由是自檜以下而入於唐矣故蘇軾謂韓愈文起八代之衰蓋謂自漢以下無譏焉矣非無自也自唐至宋文章又分二派其以氣勝者主賈生司馬氏以辭勝者主揚班氏至於門戶旣分或則紫鄭徐庾或則土苴韓歐迢迢若胡越之距萬里而不相謀矣非所謂文人之習輕薄成風乎夫文分以時代殆天之所爲非人所可強也然亦原本六經而已典志準堯典禹貢詔誥準盤庚多方諫諍準無逸立政掌故準禮公論準春秋婉言準風莊言準雅也其帥在乎道其充在乎氣韓愈言氣盛則言之長短高下皆宜故未有無盛氣而可以爲文者也故謂葩經優於尙書不可也謂揚班優於賈馬亦不可也孔子曰辭達而已矣亦非淺俗遂可以爲達也往往有



元書 卷八十九  
俚辭諺語闖入篇幅以爲載道又有褻衣闊袖彼此廣被後人賞其佳製而不知此不量身而爲服者也吾觀尙書酒誥言一酒耳於古今君臣上下可飲不可飲三致意焉至今猶想像其低徊往復言之詳而意之篤也亦可謂之曲盡矣故聖人之言達達益無出於此矣夫言一酒尙如此况乎指陳其大者乎故文不可以僞爲也元興鄧文原貢奎袁桷姚燧馬祖常淵然肅穆虞集黃潛柳貫吳萊致度雄遠蓋皆被韓歐之風非復齊梁之衰豔也而攷有元一代帝王識漢文者獨一文宗而已何其文墨出而未衰也故論古今帝王文學莫如漢之文武斯雲龍風虎之秋而帝臣之所以賡歌也故當是時何生之幸也非所謂千載一遇乎有元數君文學不如往古而喜進文學之士不啻其歌枌杜而賦緇衣也斯則元之文章所由興而朝野崇尚風雅不替者也若夫氣不振矣

而欲以纖纖之辭薄韓歐爲土苴則賈董司馬何以稱焉斯毋乃夸大之論謂蟋蟀清於洪鐘笙笛脆於雷霆也竊嘗慕士生漢文武之時爲文章之極盛而有元之崇尚風雅亦致足多也故錄自劉祁以下四十有餘人爲文苑傳所謂天地榛蕪而日月星辰昭昭其不墜乎

劉祁字京叔大同渾源人也父從益在金史文藝傳祁少穎異有奇童之目弱冠舉進士不第卽閉戶讀書一放意於古文閒出古賦數篇李純甫趙秉文楊雲翼雷淵王若虛見之皆曰異才也交口騰譽之後與麻革俱爲太學生太宗五年國兵已圍汴祁革皆在圍城中而金西面元帥崔立以城降欲以保全生靈爲名要尙書省爲立碑頌己功德時當執筆者爲王若虛元好問而二人畏物議因託言須出自草野否則非公也立黨翟奕乃召祁革至省



使爲之皆固辭既而促迫不已祁乃爲文以付好問好問及若虛  
刪定焉然碑卒不立也金亡祁遂北還鄉里躬耕自給築室榜曰  
歸潛自號曰神州遯士著書消日然歸潛志金史多取用焉逾數  
歲太宗詔試儒人祁就試魁南京選征南行臺粘合南合迎至相  
待以賓友又七年卒祁嘗言宋興內外上下皆儒者顯榮至宣政  
極矣金國士氣遂不振今日困頓衰頹亦何足怪惟適當此運者  
爲不幸耳然窮達一也又何歎也祁文名滿天下而顛躓不偶入  
元亦不達故以寄其慨云弟郁字文季中統時爲左右司都事出  
尹新河召拜監察御史能文工書翰別號歸愚名亞於祁麻革字  
信之臨晉人父秉彝仕金爲兵部侍郎革生中條王官五老之下  
長侍其父西觀太華迤邐東游至洛遂避地家焉正大中復隱內  
鄉山中頃之爲太學生有文名崔立立碑革不從命金亡後嘗自

雁門踰代嶺之北留滯居延太宗十一年革就試武川歸道渾源  
訪劉祁登龍山絕頂自作游記竟居中條以終學者稱貽溪先生  
時又有張澄者字仲經一字之純本出遼烏惹族遷隆安後復家  
洛水元好問之令內鄉革及澄杜仁傑皆從之築室以居北渡後  
薄游東平嚴實待以賓師之禮授館長清別墅十餘年致力文史  
晚參議東平萬戶府事卒子孔孫自有傳仁傑在隱逸傳其時又  
有楊宏道字叔能淄川人金末監麟游酒稅又仕宋爲唐州司戶  
又入元寓濟源憲宗時卒元好問盛稱其詩以爲與辛愿李汾皆  
號稱專門劉祁亦以宏道與元好問李汾杜仁傑並稱於時云  
戴表元字帥初一字曾伯慶元奉化人也七歲學古詩文多奇語  
稍長從里師習詞賦輒棄不肯爲宋咸純中入太學爲內舍生登  
進士乙科教授建甯府後遷臨安教授行戶部掌故皆不就大德



八年表元年已六十餘執政薦之於朝起家爲信州教授再調婺州以疾辭初表元閔宋文章萎茶辭尤骯髒慨然以振起斯文爲己任時慶元王應麟台州舒岳祥竝以文學師表一代表元皆從受業故其文日盛然深自秘重不妄許與人至元大德間東南以文章大家名重一時者表元而已晚以翰林修撰博士論薦而老疾不可起年六十七卒表元性好山水每策杖臨眺遠不十里近才數百步不求甚勞意倦輒止忘懷委分或自稱質野翁充安老人然其辭多悲憂感憤也

仇遠字仁近一字仁父杭州錢唐人也好古博雅宋咸純中已號能詩近體主唐古體主選嘗嘯歌自得部使者強起之教授溧陽州旋以杭州知事致仕優游湖山以壽終初遠與同邑白珽齊名吳下人謂之仇白早歲所刻集方鳳牟獻戴表元皆爲之序又時

與周密趙孟頫吾邱衍鮮于樞方回黃潛馬臻相唱和名震一時游其門者亦多負文望珽字廷玉八歲能賦詩宋亡後授徒藏書家晝繙夜誦燈花墜穴帽不知也其專精如此丞相伯顏翰林承旨程鉅夫南臺中丞劉宣交薦皆辭不赴江浙平章李衍強起爲太平路學正累遷江浙儒學副提舉以蘭溪州判官致仕結廬西湖金沙灘榜其門前淵曰湛淵因以自號晚復歸老棲霞又號棲霞山人戴表元嘗序珽集謂注波五經之淵披條百氏之晚年八十一致和元年卒遠珽入元沾微祿皆坎坷不進而名特高珽尤名至孝內行甚篤爲不可及李衍字仲賓蘄州人別號息齋道人博學多通尤以畫竹著稱歷吏部尙書集賢大學士謚文簡遠以居餘杭溪上仇山自號山村民高克恭所畫山村圖卷爲遠作也克恭字彥敬房山人初爲省郎拜江浙左右司郎中大德中擢御



史累官刑部侍郎卒贈刑部尚書諡文簡克恭高逸有漢晉風暢師文之爲太平總管克恭爲山南副使累言己位不可居賢者上卽自辭去畫有古趣酒酣揮毫神施鬼設不可端倪一日游西湖見素屏雅潔乘興寫奇石古木後趙孟頫見之爲補叢竹虞集復題詩其上人遂以爲三絕詩有云國朝名筆誰第一尙書醉後妙無敵卒後購其遺墨一紙輒千百緡也

胡長孺字汲仲婺州永康人也父居仁宋純佑進士知台州有聲長孺初從外舅徐道隆入蜀銓試第一授迪功郎監重慶酒稅遷福甯通判會宋亡退棲永康山中至元二十五年以薦入朝世祖召見拜集賢修撰以與宰相議不合改教授揚州久之遷甯海主簿元祐初轉長山場鹽司丞以病辭遂不復仕隱杭州虎林山以壽終長孺專務明本心之學嘗言人雖至靈與物同產初無二本

其論頗涉二氏而文則有精魄碑版焜煌照耀四裔惟不妄與人  
有宋內監司徒羅知悌以醫知名士大夫閒嘗奉鈔百錠求爲父  
銘墓長孺怒曰我豈爲宦官執筆耶是日正絕糧其子以情白坐  
客或勸受之長孺卻益堅嘗舉其詩以告人曰薄糜不繼襖不暖  
謳吟猶是鐘球鳴此余秘密藏中休糧方也人多其操方爲吏亦  
善治訟以神君稱事多不具載從兄之綱字仍仲之純字穆仲當  
時號爲三胡皆篤行能文是時處州鄭滌孫字景歐弟陶孫字景  
潛皆宋季進士滌孫仕宗正丞入國官集賢學士陶孫入元官江  
西儒學提舉又崇德張伯純字師道亦宋進士仕觀察推官以薦  
入朝累遷翰林學士侍講俱以善屬文見稱滌孫陶孫隆福宮以  
其前朝士乃製衣親賜之人以爲異遇焉又慈溪姚登孫字廷禮  
宋季舉鄉貢宋亡退居雙峰別墅爲文淵奧宏博超絕蹊徑王約



薦授國子助教卒

方回字萬里號虛谷徽州歙人也宋景定三年別省登第提領池陽茶鹽累遷知嚴州國兵至州回言必死事已而服國人服首導引者回也回既迎降卽以爲建德路總管回乘勢嚇取民數萬金尋爲安撫使罷乃徜徉杭歙聞自號紫陽居士竟以壽終初回在宋昵於賈似道似道勢敗回遂上書言似道十可斬舉城歸國終以不用乃遂肆意於詩所撰瀛奎律髓乃選唐宋以來近體詩評論之大旨排西崑而祖江西倡爲一祖三宗之說一祖者杜甫也三宗者黃庭堅陳師道陳與義也其隲評於情景虛實之間三致意焉往往過於拘方非詩法也回行事尤醜繆害及鄉里然詩實有重名於時一時風雅勝流皆樂與之接晚益崇正學人莫不重其言而怪其行又泉州蒲壽宥壽庚兄也初知梅州有清名宋亡

黃冠野服自稱處士然益廣二王航海至泉壽庚距城不納皆壽宥陰謀壽庚納款歸國亦壽宥密主之然其詩沖淡閒遠論者以爲與回俱不可測也又回同邑楊公遠字叔明亦能詩回爲跋其集公遠宋人未嘗仕元然干謁當路頌其德政人以此少之又趙文字儀可一字惟恭號青山廬陵人宋咸純鄉貢始與文天祥同師事歐陽守道天祥起兵勤王文與謝翱王炎午皆入其軍府文入元爲東湖書院山長選授南雄文學文有哀江南之餘音人以爲庾信之流也

牟應龍字伯成獻子也獻附見隱逸方逢辰傳應龍幼警敏當以世賞補京官盡讓諸從弟咸純中舉進士時賈似道當國以應龍名臣子孫語馬廷鸞欲見之許處以高第應龍拒不往及對策具言上下內外之情不通國勢危急之狀考官遂抑之調光州定城



尉應龍曰昔吾祖以對策忤史彌遠得洪雅尉今固當爾無愧也沿海制置司辟爲屬以疾辭宋亡留夢炎以書招之曰苟至翰林可得也不荅已而起家教授溧陽州以上元縣主簿致仕應龍父子自爲師弟人比之眉山蘇氏爲文長於敘事時人求乞者車轍交於門以文章大家稱於東南學者稱爲隆山先生泰定元年卒年七十八

馬端臨字貴與饒州鄱陽人也父廷鸞爲宋右丞相傳在宋史端臨以蔭授承事郎後咸純中中漕試第一其時廷鸞方與賈似道不合去國故端臨遂留侍養不與計偕宋主累旣入覲至元十五年世祖徵廷鸞赴闕不至留夢炎爲吏部尙書素重端臨欲薦用之以親老辭二十六年廷鸞卒久之端臨用薦長慈湖書院移柯山端臨博學多才以爲宋亡將一代制度恐至散佚而家有藏書

及得諸廷鸞所語朝章國故庶幾文獻足徵因是而上推之至於隆古都爲一書凡三百四十八卷以繼唐通典之後名曰文獻通攷端臨自敘曰凡敘事則本之經史而參之以歷代會要以及百家傳記之書所謂文也凡論事則先取當時臣僚奏疏次及近代諸儒之評論名流之燕談稗官之記錄所謂獻也其有史傳可疑及先儒論辨有未當者研精覃思悠然有得則竊據己意附其後焉而端臨書於宋事爲特詳論者以爲貫穿百代通儒之業也端臨著是書二十餘年乃成延祐四年遣使尋訪有道之士至饒州路錄上其書六年詔本路官爲校勘刊印以廣其傳俄授台州教授旋引年卒

鄧文原字善之一字匪石潼川綿州人也父徙錢唐宋末以流寓中浙西漕試入元辟杭州路學正累遷翰林修撰至大中預修成



宗實錄遷江浙儒學提舉仁宗召爲國子司業科舉制行文原校  
士江浙慮士守舊書大書朱熹貢舉私議於門逾數歲遷翰林待  
制出僉江南浙西道廉訪司事移江東道徽甯廣德三郡歲入茶  
課鈔三千錠後增至十八萬錠竭山谷不能充其半皆鑿空取民  
閒時榷茶轉運司得專制有司五品以下官皆杖決州縣莫敢誰  
何文原請罷專司俾州縣兼領不報英宗卽位召爲集賢直學士  
會地震文原請決滯囚置倉廩河北儲羨粟以振饑復申前罷榷  
茶專司議又不報明年兼國子祭酒泰定初開經筵文原兼經筵  
官以疾致仕歸累拜翰林侍講學士嶺北湖南道肅政廉訪使不  
赴致和元年卒年七十一文原學有本原大德延祐閒獨以詞林  
耆舊主持風氣袁桷貢奎左右之士多景附響從元之文章於是  
時爲極盛爲僉憲亦善決疑獄人以爲神徽民謝蘭家僮死蘭從

子回賂死者家誣蘭殺之蘭誣服文原廉得其情釋蘭而坐回時  
久旱不雨決獄乃雨

鮮于樞字伯機蘄州漁陽人也至元閒以才選爲浙東宣慰司經  
厯改江浙行省都事意氣雄豪每晨出則載筆櫝與其長廷爭是  
非暇多漁獵山澤閒軒騎所過父老環指曰此我鮮于公也及日  
晏歸則焚香弄翰墨取古鼎彝器陳諸階除搜抉斷文廢款孳孳  
不倦賓至則相對吟詠竹林閒命觴徑醉醉極作放歌怪字見者  
皆以爲奇崛不凡人也公卿以詞翰屢薦入館閣不果用遷太常  
典簿晚閉門謝客營一室名曰困學齋自號困學民又號直寄老  
人大德六年卒樞與趙孟頫相友善文采風流傾動一世居錢唐  
時趙孟頫爲圖其像虞集贊之曰斂風沙裘馬之豪爲湖山圖史  
之樂翰墨軼米辭而有餘風流擬晉宋而無作其見推如此樞與



人交誼具有終始有章邱張斯立可與燕李立義仲方在京師同  
宦相友善後斯立除江浙郎中立義除鹽司經歷復與樞同會於  
杭立義亦以書畫有聲於時及卒官斯立與樞書言仲方家貧孤  
寡無依吾以女配其中子矣樞聞訃爲位哭之遂將其女配其長  
子從善而經紀其家後斯立官終參知政事從善仕至紹興推官  
從善弟至淮安總管人以是多之是時又有與樞及高克恭同學  
爲詩昌平何失字得之負才氣而家善織紗穀日出賣紗騎驢吟  
咏道中指意良遠至正間被薦以親老不就年八十而終宋无者  
字子虛舊字晞顏早侍親江西從歐陽守道學壯歲負氣視功名  
如不經日宋末兵起自晉陵遷吳冒朱姓雖奔走搶攘學業不怠  
父國珍仕元領征東萬戶案牘適病痿无乞以身代入海抵竹島  
風雹交作隨驚濤上下經高麗諸山羅沈疴瘦骨柴立未嘗廢吟

咏至元二十四年憲司舉茂才以奉親辭趙孟頫以爲其詩風流  
蘊藉非尋常語時又有李材字子構奉元人詩多奇句亦爲孟頫  
所賞已而早卒時人以爲唐人中李長吉也

姚燧字端甫號牧菴左丞姚樞從子也樞有傳燧生三歲而孤樞  
育之方居蘇門山謂燧蒙閭教督甚急楊奐馳書止之曰燧令器  
也許醮以女稍長從許衡學燧自讀韓愈文而習之衡亦賞其文  
然戒曰士有能一世之名將何以應人之見役者哉至元中衡爲  
國子祭酒教貴胄燧以衡弟子徵爲伴讀出爲秦王府文學兼提  
舉陝西學校以秦王命安輯庸蜀凡三使蜀皆稱職再遷翰林直  
學士改大司農丞元貞初以翰林學士總裁世祖實錄書成授江  
東廉訪使移病寓太平遷江西參知政事仁宗在藩開宮師府燧  
年已七十遣正字呂洙如漢徵四皓故事起爲太子賓客尋拜太



子少傅辭曰昔臣伯父樞尙不敢拜是官臣何敢受改翰林承旨知制誥兼修國史至大四年得告南歸明年復召不至年七十六卒諡曰文燧終以文名海內求碑傳者多集其門然非人不與辭無溢美又須廣置宴樂燧喜則疾書否則不易得也其方嚴而風趣如此然實未嘗有所措意爲承旨上日設宴燧睹樂妓一人異常問知其故家子也卽爲落籍以妻小史高麗國王璋入爲駙馬都尉瀋陽王求得燧詩文致幣帛金玉名畫五十筐燧卽時散之於財賄泊如也惟頗恃才輕睨趙孟頫元明善輩嘗曰吾能爲有題之文無題者惟元明善能之吾不能也盧摯字處道一字莘老號疏齋涿州人博洽有文辭累遷河南路總管拜集賢學士累出廉訪湖南江東復召爲翰林學士進承旨卒元初中州人士推能文曰姚盧謂燧及摯也而推詩專家則曰劉盧謂摯及劉因也因

在儒林傳孟頫自有傳時又有劉致字時中石州甯鄉人早爲燧所激賞初任永新州判歷翰林待制太常博士出爲江浙都事卒貧無以葬道士王壽衍躬往弔哭周其遺孤葬之於德清致嘗議郊廟事語在郊祀志

元明善字復初大名清河人也穎悟絕出弱冠游吳中已名能文章浙東使者薦爲安豐建康學正辟椽行樞密院時董士選僉院事待之如賓友士選遷江西左丞又辟爲省椽仁宗居東宮首擢爲太子文學及卽位授翰林待制預修成宗實錄遷翰林直學士詔節尙書經文譯其關政要者以進帝覽輒稱善曰二帝三王之道非卿莫聞也以與修武宗實錄又遷翰林侍講學士延祐二年始會試天下士明善充考試官廷試又爲讀卷官所取士後多爲名臣轉禮部尙書仁宗以孔思晦襲封衍聖公明善所啟也歷拜



翰林學士修仁宗實錄英宗親裸大室禮官進祝冊請署御名命明善代署者三眷遇莫比至治二年卒後贈清河郡公謚文敏明善初在龍興建康每與虞集劇論以相劇切相得甚懽至京師寢不相下會董士選自中臺行省江浙二人俱送出都門士選辭集而邀明善復前一舍卽舉酒屬明善曰士選功臣子出入臺省無補國家惟爲朝廷求人耳我觀復初與伯生皆賢者然恐不免爲人構閒伯生南人復初中原人勢當摧伯生矣今爲我飲此酒勿爾也明善跪醕起稱不敢忘他日人求明善碑明善曰當招伯生觀之集至爲刪百許字而文益精明善大服遂驩好如初虞集自有傳集弟槃字仲常延祐五年進士授吉安永豐丞除湘鄉州判官通詩書春秋皆有論著方正過於乃兄雖集亦嚴憚之後遷嘉魚縣尹槃已卒

袁桷字伯長慶元鄞人也曾祖韶宋同知樞密院事傳在宋史父洪有聲士林仕宋建康通判桷爲童子時已著聲後舉茂才異等授麗澤書院山長大德間閻復程鉅夫王構薦爲翰林國史院檢閱官時初建南郊桷進十議禮官推其博洽多采用之語具郊祀志又嘗上國學議其略曰今科舉廢而國學定制深有典學教胄子之意竊謂宜如唐制五經各立博士俾專治一經互相問難以盡其義至於當世之要則略如宋胡瑗立湖學法講習禮樂兵農海運河渠等事往者朱熹議貢舉制亦欲以經說會萃先儒用心實欲見之行事自宋末年尊崇朱熹之學脣腐舌敝止於四書之註故凡刑獄簿書金穀戶口靡密出入皆以爲俗吏而爭鄙棄清談危坐卒至亡國而莫可救而近者江南教法止於四書復大言以蓋之議禮止於誠敬言樂止於中和其不涉史也謂自漢以下



皆霸道其不能詞章也謂之玩物喪志又古者春夏學干戈秋冬  
學羽籥若射御書數皆得謂之學非若今所謂四書而止也識者  
謂足正時人之陋尋轉應奉翰林文字同知制誥兼國史編修請  
購求遼金宋三史遺書歷集賢翰林直學士知制誥同修國史侍  
講學士泰定初告歸四年卒贈中奉大夫江浙參知政事陳留郡  
公諡曰文清桷初師事戴表元後從王應麟舒岳祥游在詞林朝  
廷制冊勳臣碑銘多出其手家居以後修闕南園故址結小亭讀  
書其中翰墨所傳極於海內後修三史遣使者求郡國故事惟袁  
氏所傳爲多元時故家文物萃於東南百年以來流風未墜論者  
以爲桷實有功焉桷嘗與鄧文原貢奎虞集元明善馬祖常王士  
熙相唱和奎已見其子師泰傳祖常附其祖月合乃傳士熙附其  
父王構傳

李洞字漑之益都滕州人也幼穎悟強記善屬文姚燧歎異焉薦  
授國史院編修以親老就養江南久之辟中書掾累除太常博士  
丞相拜住聞其名擢監修國史長史歷秘書監著作郎太常禮儀  
院經歷泰定初除翰林待制以親喪歸天祗初復以待制召於是  
文宗方開奎章閣延天下知名士洞超拜翰林直學士卽授奎章  
閣承制學士著輔治篇以進文宗嘉之朝廷有大議必使洞與焉  
會詔修經世大典洞方臥疾卽強起同修書成謁告歸再除翰林  
直學士竟以疾不起卒洞秀眉疏髯目瑩如電顏面如冰玉脣如  
渥丹峩冠褰衣神情開朗望之者以爲神仙中人而爲文奮筆揮  
灑意態曼出每自擬李太白嘗游匡廬王屋少室諸山留連久之  
乃去人莫測其意也僑居濟南有湖山花竹之勝作亭曰天心水  
面文宗敕虞集爲之記亦善書其篆隸行草皆見重於世



黃潛字晉卿婺州義烏人也母童氏夢大星墮懷有娠歷二十四月始生比成童授以詩書不一月成誦性篤孝母沒營冢域有乳虎馴狎之異時人稱焉延祐開科成進士授甯海丞累遷諸暨州判官皆以績聞入應奉翰林文字同知制誥兼國史編修轉國子博士時欲增設禮殿配位四配位合西嚮學官或議分置左右同列不敢爭潛獨面折之事乃止尋提舉江浙儒學潛年始六十七不俟引年亟請納祿絕江徑歸遂以秘書少監致仕未幾復起除翰林直學士知制誥同修國史尋兼經筵官執經進講者三十有二帝嘉之數出金織文段以賜遷侍講學士知制誥同修國史同知經筵事復上章求歸不待報而行詔追還前官久之始得南還年八十一卒贈中奉大夫江西參知政事護軍江夏郡公諡曰文獻潛素行挺立貴而能貧遇佳山水則觴詠其閒論者謂潛高介

類陳師道文辭溫醇類歐陽修筆札俊逸類薛稷歷事五朝文望巍然與虞集揭傒斯柳貫齊名號儒林四傑貫字道傳潛同郡浦江人器局凝定端嚴若神用察舉爲江山教諭旣而召爲翰林待制馬祖常薦其堪任風憲不報滿而歸杜門十餘年餽粥不給裕如也貫受經於金履祥其文章軌度則出於謝翱方鳳吳思齊方回龔開仇遠戴表元胡長孺其史學及舊聞則出自牟應龍初至京爲吳澄所器程鉅夫以墨一丸授之曰文章正印今屬子矣自號烏蜀山人門人私諡曰文肅亦工篆隸杜本謂不減李陽冰貫同邑吳萊字立夫父直方爲知樞密院脫脫師說脫脫大義滅親逐伯顏以安國家事已具脫脫傳直方仕至集賢大學士萊幼羸弱雙瞳碧色七歲能屬文天姿絕人嘗往族父家日易漢書一帙以去族父迫叩之萊琅然而誦三易他編皆如之眾驚爲神與黃



元書 卷八十九  
古  
潛柳貫同出方鳳之門延祐中以春秋舉上禮部不第退居深裏  
山中篤志著書嘗出游海東洲歷蛟門峽過小白華山登盤陀石  
作觀日賦以見志柳貫素慎許與每稱萊爲絕世才黃潛晚年謂  
人曰萊之文蘄絕雄深類秦漢非今世之士也後以薦調長長薌  
書院未上卒門人私謚曰淵穎先生

楊載字仲宏建甯浦城人也後徙杭州爲杭人少孤博涉羣書年  
四十不仕戶部賈國英數薦於朝以布衣召爲國史院編修與修  
武宗實錄延祐二年成進士歷甯國路總管府推官卒初趙孟頫  
在翰林得載所爲文極推重之由是知名其文跌宕有奇氣詩宗  
漢魏盛唐一洗宋季之陋虞集詩自負爲漢廷老吏而稱載詩謂  
如百戰健兒云有元之盛詩家稱虞趙楊范揭范梈字亨父一字  
德機清江人家貧早孤母熊氏教之梈天姿朗異卓然自樹於流

俗居則困窮竭力以養親出則假陰陽之技以給旅食年三十六  
北游賣卜燕市董士選延之家塾用薦爲翰林編修出爲海北海  
南道廉訪司照磨累官福建閩海道知事閩俗素污文繡局取良  
家子以爲繡工無別尤甚梈作詩歌述其弊廉訪使取以上聞皆  
罷遣之未幾移疾歸徙家新喻百丈山天祿二年遭母喪相繼卒  
吳澄以爲特立獨行東漢諸君子也人重其賢稱曰文白先生同  
時天台丁復字仲容負詩名延祐初游京師公卿奇其才與楊載  
范梈同薦入館閣復度當國者不能用不俟報可翩然去之乃絕  
黃河憩梁楚過雲夢窺沅湘陟廬阜浮大江而下遂家金陵買宅  
城北地故有兩檜樹醉則倚樹呶晤因自名其居曰雙檜亭復詩  
夷曠而託酒自放時人以太白方之又大名趙執謙伯益與楊載  
杜本爲友執謙性豪邁而詩簡淡蕭遠亦好言仙佛始承旨閩復



元書 卷八十九 三  
以爲執謙宜應奉翰林思見之執謙不屑也後四十餘竟得翰林應奉知制誥國史編修卒梈又有弟子傅若金與礪新喻人少酷貧業織席又爲針工後有所激乃讀書受詩法於范梈既而以布衣游京師數日之間名大噪虞集宋褰以異才薦使安南歸除廣州教授卒載同時楊剛中字志行上元人善屬文名爲奇奧官終翰林待制剛中子翽字文舉官太常博士甥李桓晉仲官江浙儒學副提舉亦俱以文名

揭傒斯字曼碩龍興富州人也父來成宋鄉貢進士傒斯承其家學食貧攻苦大德閒稍出游湘漢湖南帥趙淇及憲使程鉅夫盧摯咸器重之鉅夫且妻以從妹延祐初薦授國史編修時李孟監修國史見所撰功臣傳歎美焉轉應奉翰林文字遷國子監助教復留應奉南歸省母尋召還凡三人翰林臺閣典章靡不諳練天

秣初開奎章閣首擢授經郎帝恆以字呼之每中書奏用儒臣必問曰其才何如揭曼碩閒出所上太平政要以示臺臣曰此朕授經郎揭曼碩所進也其見親重如此與修經世大典特授藝文監丞參檢校書籍事順帝卽位賜以親王所服表裏各一累遷集賢學士奉命祀北嶽濟瀆南鎮便道之家時伯顏當國屢促其還輒以疾辭既而召除奎章閣供奉學士未至改翰林直學士尋遷侍讀學士同知經筵事以對品進階中奉大夫時新格超升不越二等傒斯獨進四等轉九階皆帝親擢也至正二年年七十致仕去至潮南召還撰明宗神御殿碑再乞去不許丞相脫脫奉命慰留問以政要何先曰儲才爲先養之位望未隆之時用之周歷庶務之後此盛世所以不失才不廢事也尋詔充遼金宋三史總裁官傒斯亦爲脫脫言修史以用人爲本雖有學問文章知史事而心



術不正者不可與也由是毅然以筆削自任踰年遼史成詔仍督  
早成宋金二史後斯留宿史館朝夕不敢休因得寒疾七日卒命  
厚賻護喪歸江南六年贈豫章郡公諡曰文安後斯少處窮約及  
有祿輒愀然曰吾親未嘗享也故平生清儉自持在京師三紀出  
入未嘗乘馬立朝雖居散地而薦士如不及文名盈海內朝廷大  
典冊必以命焉殊方絕域皆知揭後斯云子泫字伯防少純樸苦  
學十八補太學生端方有威儀士敬憚之以蔭補秘書郎歷翰林  
國史編修出僉福建肅政廉訪司事駐建甯陳友諒寇松關建甯  
受圍泫與經略使普顏不花協謀禦賊設方略復延平等郡改江  
西行省郎中未赴召爲秘書少監而淮浙道不通遂留慈谿寓居  
僧舍卒年七十有三後斯同郡何中太虛以古學自任吳澄後斯  
皆推服之

劉詵字桂翁吉安廬陵人也性穎悟幼孤知自樹立年十二試爲  
文卓然老成人宋之遺老鉅公皆器重之詵得聞其緒論延祐設  
科後益肆力於名物度數訓詁箋注之學既十年不第乃刻意於  
詩古文聲譽日隆江南行臺屢以教官館職遺逸薦皆不報詵嘗  
與揭後斯書稱文章宜古而不期於襲善而不期於同宜理達神  
超變化起伏而不盡期於收斂平緩之勢歐陽原功序其文以爲  
溫柔敦厚似歐明辨雄深似蘇至論其妙非相師非不相師其推  
服如此詵於諸父昆弟盡恭敬友愛恆產悉以推讓從子年八十  
三至正十年卒王榮祿爲請於朝諡曰文敏

迺賢字易之本葛邏祿氏漢姓爲馬世居金山之西元興西北諸  
部仕中朝者多散處內地故迺賢稱南陽人又從其兄宦游江浙  
卜居於鄞嘗至京師以能文名尤長詩歌每一篇出土大夫輒傳



誦之時浙人韓與玉能書王子充能古文迺賢與二人偕來人目  
爲江南三絕久之歸浙東辟長東湖書院以薦授翰林編修出參  
桑哥失里軍事卒迺賢性不喜仕宦而爲詩天才宏秀氣格軒翥  
虞集黃潛張起巖揭傒斯歐陽原功貢師泰皆稱之詩名亞薩都  
刺云時又有辛文房字良史亦西域人以文名原功起巖師泰皆  
自有傳

陳旅字眾仲興化莆田人也姿稟穎異游溫陵傳古直之門用薦  
爲閩海儒學官適御史中丞馬祖常使泉南一見奇之謂曰子館  
閣器也因勉游京師虞集見其文歎曰我老將休付子斯文矣卽  
延至館中朝夕相講習自謂得友旣而以趙世延薦除國子助教  
攷滿諸生乞留聽再任焉元統二年出爲江浙儒學副提舉逾數  
歲入應奉翰林文字遷國子監丞卒旅爲文典雅峻潔必求合古

作者義篤師友常感虞集爲知己當在江浙時歲且大比請於行  
省李朮魯紳親奉書幣衝冒炎暑千里至臨川請集主文集感其  
來惓惓不忍別一日集夢旅舉杯相向俄聞旅卒集深傷悼時人  
莫不歎息同時王沂嘗與陳旅傳若金許有壬周伯琦相唱和沂  
字師魯先世雲中人徙真定父元父官承務郎監黃池稅務沂延  
祐二年成進士歷臨淮縣尹嵩州同知至順時爲國史編修順帝  
時遷國子博士入試院同攷余闕其所得士也後遷翰林待制待  
詔宣文閣進禮部尙書總裁遼金宋三史至正末卒沂歷躋館閣  
廟堂制作多出其手論者謂沂詩文有先正軌度云

柯九思字敬仲台州仙居人也父謙官至江浙儒學提舉九思以  
蔭補華亭尉不就文宗知之於潛邸及卽位擢典瑞院都事奎章  
閣置特授鑒書博士賜牙章得通籍禁署以謙善教子錫碑名訓



忠敕虞集撰焉九思寵顧日隆忌者亦日眾至順三年御史劾九思賦性矯謫挾末技以趨權門遂罷官流寓中吳與李孝光張翥楊維禎倪瓚皆往來顧瑛玉山草堂詩酒敖游以卒九思能詩文善楷書竝畫竹木筆勢生動論者以爲文與可之流也每得意輒題詩其上一時珍貴稱爲三絕善鑒識金石鼎彝之器吳人陸友號爲博物亦歎爲不及又好填詞有北曲十二本是時又有夏文彥字士良號蘭渚生湖州人居於松江好古嗜學尤篤愛繪事家藏翰墨最富當時賞鑒家隨其甲乙以定高下無毫髮爽乃自史皇封膜而下訖於有元網羅無遺名圖繪寶鑑藝術之士皆以爲該博也

李孝光字季和或曰季昶溫州樂清人也少博學篤志復古隱居教授白野秦不華嘗師事之南臺御史屢薦居館閣至正七年詔徵隱士以秘書監著作郎召與完者圖執禮哈琅董立同應詔赴京師見帝宣文閣進孝經圖說順帝大悅賜上尊明年遷秘書監丞卒官孝光以文負名當世文必法古人非先秦兩漢不以措辭爲人美髮髯偉幹居雁蕩山五峯下自號爲五峯狂客董立者字植夫咸甯人召拜翰林修撰累遷西臺侍御史

鄭元祐字明德處州遂昌人也後家錢唐是時宋咸純諸老猶在元祐徧游其門父沒僑居平江學者雲集臺省爭以潛德薦之元祐以臂疾不願仕優游吳中幾四十年至正十七年除平江路教授一歲移疾去久之擢江浙儒學副提舉居九月卒元祐兒時傷右臂能左手書遂自號尙左生爲文滂沛豪宕有古作者風詩清峻蒼古顧瑛玉山草堂文酒之會名流畢集記序多推屬元祐東吳碑碣有不貴館閣而貴其所著者周砥字履道無錫人與宜興



馬治交厚至正十三年祗遭亂客治家治館祗荆溪山中爲作  
具巾車泛舟窮陽羨溪山之勝有荆南唱和集鄭元祐爲之序宜  
興多富人與治善者咸置酒張樂召祗祗心惡之一日貽書別治  
夜半遁去歸吳中嘗與顧瑛玉山雅集已又去之會稽沒於兵祗  
博學工文詞兼善書畫同時張憲字思廉山陰人別號玉笥生負  
才自放嘗走京師恣言天下事眾駭其狂還富春山中一日升高  
望遠呼所親曰亟去人皆怪之三日寇猝至死者五百餘家始悔  
不用憲言張士誠辟爲樞密院都事吳亡變姓名走杭州憲初薄  
遊四方誓不娶不歸鄉里中遭兵亂混緇黃以自存晚寄食報國  
寺以死嘗爲琴操序云干戈不息殆將十年余流連江湖閒幽憂  
憤奮不見中興涯際四方又無重耳小白之舉深山大澤所不忍  
言將仗劍軍門而所依者何在乃作琴操十二章以寄意其懷燕

臺云秋草兮芊芊黃金臺兮夷爲淵悵廣宇兮裂瓦望離宮兮生  
煙淚可盡兮目可穿懷昭王兮不可言蚤學於楊維禎維禎嘗言  
游吾鐵門者憲其傑也

張翥字仲舉晉甯人也父爲杭州鈔庫使因家焉翥少負才好蹴  
踘喜音樂性豪放不羈一旦謝客閉門讀書不輟聲譽日起久之  
學者及門日眾後至元末同郡傅巖起居中書薦翥隱逸至正初  
召爲國子助教分教上都生尋退居淮東會修宋遼金三史起國  
史編修史成厯應奉修撰太常博士禮儀院判官累遷翰林侍講  
學士兼祭酒翥勤於誘掖絕去崖岸與諸生剖析經義必厯舉眾  
說爲之折衷論辨之際雜以談笑無不厭其所得而後已後除集  
賢學士以翰林學士致仕孛羅帖木兒之擁兵入都強翥草詔削  
奪擴廓帖木兒官爵且發兵討之翥毅然不從或勸之曰吾臂可



斷筆不可操也。李羅帖木兒既誅，詔乃以翥平章河南政事。仍翰林學士承旨，致仕給全俸。終其身。晚自號蛻菴。年八十二卒。無子。翥學詩於仇遠，學文於李存文。不如詩而每以文自負。嘗語人曰：吾於文已化矣。一日劉沙刺班示以文，請竄易之。翥仰首移時，終不就。沙刺班曰：先生於文豈猶未化耶？何思之苦也。因相視大笑。翥平日善諧謔，談吐至傾一座。云沙刺班字伯溫，甘州人。仕至江西廉訪使。成廷珪字原常，一字元章，又字禮執，揚州人。好學。尤工於詩。奉母居市廛，植竹庭院間，綽有山林逸趣。扁其軒曰居竹張翥，與爲忘年交。載酒過從，殆無虛日。廷珪謂曰：吾仕宦無天分，田園無先業，學藝無他能，惟習氣在篇什。朝哦夕誦，自娛而已。晚年世亂奔走艱險，卒於松江。

周伯琦字伯溫，饒州鄱陽人也。父應極字南翁，至大間獻皇元頌。

授翰林待制。後終同知池州總管府事。伯琦自幼從宦游京師，入國學以蔭。授南海主簿。三轉爲翰林修撰。至正元年，改宣文閣授經郎。日被顧問。順帝以伯琦工書法，命篆宣文閣寶，仍題榜額。及摹王羲之書蘭亭序，竝智永所書千文，刻石閣下。帝眷遇日厚，常呼伯溫而不名。會御史奏風憲宜用近臣，特命僉廣東廉訪司事。八年，召還待制翰林。與修后妃功臣傳。自世祖後，臺省之職，南人斥不用。十二年，詔臺省南人皆得居之。遂與貢師泰同擢御史。以兩人皆南士之望也。是時紅巾盜熾，丞相脫脫奏以其弟御史大夫也先帖木兒統大軍南討，而失律喪師。西臺御史劉希曾等十二人共劾奏之。伯琦希丞相意，乃奏希曾等越分干譽，皆坐左遷。判郡由是不爲公論。所與明年遷崇文太監兼檢校書籍事奉命至姑蘇祀海口漕神廟，親爲記書之。未幾授湖北肅政廉訪使。長



槍軍鎮南班陷甯國琦與僚佐倉皇出見之尋遁走杭州除兵部  
尚書改廉訪浙西南臺御史余觀劾伯琦失陷甯國宜正其罪十  
七年江浙左丞相達識帖睦迺承制假伯琦參知政事招諭張士  
誠士誠既降御史亦請釋伯琦除同知太常禮儀院事士誠留之  
未行拜江浙左丞於是留平江者十餘年張氏爲造第宅於乘魚  
橋北厚其廩給士誠既滅伯琦乃得歸鄱陽三歲卒伯琦儀觀溫  
粹遭時多艱善於自保而博學多能文章淹雅藝林重之子宗仁  
字克復篆書宗其家學官山東行省郎中

黎則字景高號東山安南人也隨昭國王益稷歸國居漢陽遙授  
歸化路宣撫僉事則性冲退嗜文章薄聲利人稱其詩有中士風  
焉

論曰文之爲體摯虞流別備矣然漢之文莫雄於史遷唐之詩莫  
盛於李白杜甫遷之言曰非好學深思心知其意殆難爲淺見寡  
聞者道也甫之言則曰讀書破萬卷下筆如有神嗚呼遷與甫其  
可謂文軌之至矣何則萬卷而破則真好學深思者也至於下筆  
之神則遷與甫均不能自知也雖知之而不能言也故曰心知其  
意而已今夫五味之和易牙無以殊乎人也然其不能者相去萬  
萬也此所謂淺見寡聞者也故輪人言輪而齊桓服天下事鑿以  
求之則未有不窒矣若夫雕蟲之技亦藝林所有也故亦錄其人  
焉或概以纖小去之是天地有松柏而必無桃李也又奚可哉



元書

卷八十九

三

元書卷八十九

李欽堂  
申靖濤 刊  
門人曾仁襄校  
門人曾士琮詳校

48-11460



